


KELELO ELOBI POLELE TE

 Matondi mingi, Ndeko Demos. Ezali litomba monene ya kozala awa na losambo oyo ya Baklisto na mpokwa oyo, awa na etúka ya malili oyo. Mpe nabengaki ndako, kala mingi te, mpe ezali na degré pene na zomi ya molunge, kuna na Nordi, koleka ndenge ezali awa. Nasengelaki komema yango elongo na ngai. Nakosala noki mpo tóbima mpe názonga, noki-noki. Milona nyonso ezali kokangama na malili. Omoni ndenge nini, Creech? Ezali . . . [Ndeko alobi: “Malili ezali.”—Mok.] Ezali mpenza.

² Nazali na esengo mingi ya kokutana na mokengeli malamumu oyo, na mpokwa oyo, mpe komona bino bandeko. Nauti kokóma, kala mingi te. Nauti na Tucson, esika nasengelaki kokende lelo. Nakumbaki lobi na butu, mpe nakómaki awa na bangonga ya mibale na ndambo na ntongo ya lelo, na Tucson. Na bongo, naláláki te moi mobimba, kuna. Mpe nauti kolongwa kala mingi te. . . Ee, nakómaki awa, eleki kaka ngonga moko na ndambo, nabanzi, eloko moko ya ndenge wana. Na bongo, nalálí mingi mpenza te. Kasi nakosala makasi mpo nálála awa te. Kasi tozali—tozali na esengo ya kozala awa.

³ Mwana mobali oyo ya moke, azali kosakana zinga-zinga na ba-micro awa. Nafandaki kuna na nsuka, na . . . moko na ba-kiti ya bana mike. Mwana mobali moko ayaki wana, atalaki ngai na ndenge ya kokamwa mpenza. Nalobaki: “Biso nyonso bana mike tokoki kofanda esika moko, boye te?” Sikawa, na ntembe te, nalingaka bana mike, ata bongo.

⁴ Mpe ezali, oh, ezali mpenza malamumu kozala awa na mpokwa oyo, mpe kozala na eyanganelo kitoko ya bato oyo batelemi zinga-zinga. Mpe natii motema sikawa ete Ndeko Williams ayebisaki bino makambo nyonso, ná Ndeko Rose oyo, na ntina na likita oyo ezali koya. Nabanzi ete boyebi yango malamumu. Esengeli kozala na Ramada, mbala moko, na likita ya ba-Homme d’Affaires. Mpe tozali kozela kolekisa ntango malamumu kuna. Ndeko Velmer Gardner, molobi ya mpiko moko ya malamumu mingi; ná batei mosusu, Oral Roberts mpe ebele, bakozala wana. Mpe tokolekisa mpenza ntango moko ya malamumu kati na Nkolo.

⁵ Nazulikia, ete moko na mikolo oyo, tósala liyangani moko ya kobondela mpo na babeli kuna. Ah-hah. Nakosepela kozua Ndeko Oral, mpe tósangana elongo. Iyo, misie. Ekozala kitoko mingi, boye te? Ekozala mpenza e—ebandeli moko ya malamumu, boye te? Liyangani ya kobondela mpo na babeli, kuna na Ramada, ekozala malamumu. Biso. . . Boye, tokoki kosala yango, boyebi. Nkolo akoki kopesa biso yango, kosala liyangani ya kobondela mpo na babeli. Boye, toko . . . Tozali kokende bipai na bipai sikawa, longwa na losambo moko kino na losambo mosusu,

komeka kopalanganisa nsango-malamu, kosangana bamoko na bamosusu, mpe kosala boyokani na bondeko ná ba-losambo nyonso ya ndenge na ndenge. Yango nde oyo biso tondimaka, ete tozali moko, kati na Klisto.

⁶ Nazalaki kosolola mokolo mosusu wana ná monganga moko. Nazomilengela kokende na mikili ya bapaya, mpe osengeli kosala examen ya nzoto. Boye, nazalaki kuna mpo na kosala examen ya nzoto. Mpe atiaki ngai na moko na bitalelo ya bongó . . . Ngai . . . Bótuna ngai te soki ezali nini. Amonaki eloko moko ya ndenge. Ayaki lisusu mpe akokaki kosósóla yango te, atúnaki tolí ya minganga mosusu, kasi akokaki kaka kosósóla yango te. Alobaki: “Natikálá komona yango te liboso.” Na bongo, alakisaki ngai elilingi na yango, ndenge epai lisósoli oyo moto nyonso azalaka na yango, ná subconscious, mpe ezalaka mpenza mosika moko na mosusu. Kasi amonaki ete oyo ya ngai ezalaki nyonso mibale esika moko. Alobaki: “Ozali mpenza moto moko ya ndéngé.”

Nalobaki: “Nayébaka yango ntango nyonso. Bato nyonso bayebi yango.”

⁷ Alobaki: “Totikálá komona yango te liboso.” Boye abandaki kolímbolela ngai yango.

⁸ Nalobaki: “Ee,” nalobaki, “oyebi, nabanzi ete Nkolo malam, ntango Asálaka biso, Asálaka biso na bokeseni mwa moke. Tomonanaka lokola bamoko na bamosusu te, na bongo ntango mosusu tosalaka makambo ndenge moko te. Kasi—kasi Asálaka yango mpo na Ye . . . Ezali lolenge na Ye Moko ya kosala yango. Bisó tokótaka kaka na masíni monene ya kopesa lolenge, mpe tokofanda kaka kimia, Ye nde akopésa biso lolenge oyo Alingi biso tózala.”

⁹ Mpe na—nayebi moto moko te akolinga kozala eloko mosusu longola se oyo ye azali. Eloko bobele moko oyo biso nyonso tokoki kozala na mposa na yango . . . Nsima na biso kobikisama mpe kokóma bana na Nzambe, eloko bobele moko oyo tolingi ezali kotambola mwa pene koleka mokolo na mokolo. Yango nde eloko oyo tolingaka mingi, mpo na boyokani na bondeko monene wana. Ezali kitoko mingi mpenza! Bosílá nde kotelema mwa moke mpo na kokanisa ndenge tolingaki kosala soki tozalaki na yango te? Nini—nini . . . Soki elikia monene wana ezalaki kati na biso te, tolingaki kosala nini?

¹⁰ Nazalaki koloba, na moko na ba-losambo yango, tika ná . . . Liboso, na esika moko, bongo na mosusu, mpe na ekólo mobimba, natalisaka likambo moko, mpe nakanisi ntango mosusu nakoloba yango na losambo yango moko. Kasi nazalaki kobima na liyangani moko oyo nautaki kopamela makasi, na ntina na bato oyo lelo, ndenge babínaka mabína na bango ya sika, oyo babéngaka twist, to eloko moko bongo. Mpe nalobaki:

“Nazoyeba mpenza te, mpo na nini, bato bakolinga kobuka makolo na bango mpe—mpe kosala makambo ndenge wana.”

¹¹ Boye, elenge mobali moko azalaki wana, ya mibu pene na ntuku mibale na motoba to ntuku mibale na nsambo, akutanaki na ngai kuna na nsima, alobaki: “Zela moke, M. Branham.”

Nalobaki: “Iyo, mesie?”

Alobaki: “Oyebi, ozali na yo mpenza kosósola te.”

Nalobaki: “Nazolikia kosósola yango ata moke te.”

¹² Bongo alobaki: “Omoni,” alobaki, “namoni likambo na yo.” Alobaki: “Ozali moto ya mibu ntuku mitano. Kasi soki ózalaka na mibu na ngai, elingaki kozala ndenge mosusu.”

¹³ Nalobaki: “Zela naino.” Nalobaki: “Nazalaki koteya Nsango-malamu ntango nazalaki elenge koleka yo na mibu zomi. Nazali kokóba kondima Nsango-malamu moko wana. Nasili nazuá eloko oyo ezui esika yango, mpe nazali na esengo mingi ya kosalela Nkolo koleka makambo nyonso oyo zabolo akoki kosala ata esika nini.” Ezali . . . Esepelisaka mpe esilisaka mposa.

¹⁴ Boyebi, mokolo moko Dawidi alobaki: “Lokola mbuli ezalaka koyoka mposa mokele na mai, elimo na ngai ezali koyoka mposa na Yo, E Nzambe.”

¹⁵ Mpe soki botikálá komona moko na bikelamu yango, ntango a—esili kozokisama, ntango mosusu bambwa basilaki kokanga ye, mpe bakátaki eteni monene ya mopanzi na ye, to eloko moko bongo. Azotanga makila. Mpe, mbwa akoki kolanda matámbe na ye. Azalaka lokola moto te. Mpe akoki kolanda mbuli yango, ézala ezotanga makila to te. Na bongo, nzela kaka moko . . . Soki mbuli yango azali kotanga makila, nzela kaka moko akoki kotikala na bomoi ezali kokóma esika oyo mai ezali. Mpe soki akoki mpenza kokóma esika mai ezali, akomela mai yango. Ekosala ete makila étanga lisusu te, mpe—mpe akoki kokima mosika. Azalaka mayele mingi.

¹⁶ Kasi sikawa bokoki kobanza, komóna moko na mwa banyama oyo azoki mpe azotanga makila, ndenge atómbolaka moto, mpe biyokeli na ye nyonso azalaka na yango mpo na koyeba esika mai ezali, ná zolo na ye. Asengeli kaka komona mai, soki te akokufa. Sikawa ekómi kaka likambo ya kobika to kokufa, mpo na ye. Ye, mwa biteni nyonso—nyonso—nyonso ya eyokeli oyo azalaka na yango, asálaka makasi, akómaka na mposa makasi. Asengeli komona yango.

¹⁷ Sikawa, lolenge wana nde tosengelaki kozala na mposa ya Nzambe. Bomoni? “Lokola mbuli azalaka koyoka mposa makasi ya mokele na mai, elimo na ngai ezali koyoka mposa ya Yo, E Nzambe.” Kobómbama ná Ye esika moko, oyo wana nde mposa ya motema na ngai. Mpe natii motema ete yango ezali mposa ya moto nyonso oyo azali awa na mpokwa oyo.

18 Sikawa, mpokwa na mpokwa, nasepeli komona likambo oyo. Bilongi oyo omonaka na esika moko, omonaka yango na esika mosusu. Na—nasepeli na yango. Bozali kolakisa boyokani na bondeko na bino, mpe kotalisa ntina oyo toyeli awa.

19 Mpe, oh, nakosepela mpenza komona kolamuka ya lolenge ya kala na Phoenix. Oh, la la! Liloba yango *Phoenix* esalá ngai nsái mbala ya liboso oyo natángáká yango, na ntina na yango: Phoenix, Arizona. Ee, lokola elenge mwana, nazaláká komilobela: “Soki nakoki kokóma na esika wana mokolo moko! Soki nakoki kokóma kuna, na Phoenix!” Sikawa komona yango, mpe na ntango tozali awa, tomoni yango ekóti na bozindo ya masumu, lokola bisika mosusu nyonso, ba-touriste komikotisa na loyenge, komeláká masanga, biyenga, makambo ya bosoto, ná makambo nyonso kosalema na pete.

20 Kasi, ata bongo, na katikati ya nyonso wana, bokokuta mayaka ya motuya ya solosolo oyo Nzambe abimisá na lisobe oyo, oyo ezali kongenga na motóle ya libota ya nkembo ya Nzambe. Yango nde ntina oyo nazali awa, na mpokwa oyo, mpo na kozala elongo na bino bandeko mibali ná bandeko basi, komeka kongengisa Pole ya Nkolo Yesu na bamosusu, mpo bango mpe bákoka komonana, kati na yikiyiki monene oyo. Mpe mingi kati na bango bazali naino kuna. Naza na esengo na ntina na yango. Bazali naino ebele, baoyo basengeli kokota, mpe tosengeli kosala nyonso oyo tokoki kosala mpo na kokotisa bango kuna, mpe kobika bomoi oyo ekotálisa Klisto.

21 Sikawa, liboso tótanga eteni moke ya Makomi. . . Nakomaki mpenza nsima ya ntango, nakomáki mwa makambo, na miníti pene na mitano mpamba. Mpe bato ya mpáko ya letá bauti kotindela ngai mikanda, nasengelaki koyanola yango mbala moko, mpe esengelaki kotiáma cachet ya poste, nakanisi, ntango mosusu lelo, ata bongo. Na bongo nasengelaki kokende na biró ya poste. Mpe ntango nazongaki, Billy alobaki: “Ekozala malamú ete ósála noki.” Na bongo awa. . .

22 Nazali kaka kobaluka, kobaluka, kobaluka, ná bato yango. Oh la la! Balobelaka boyengebene na bikuke ya ndako ya kosambisa. Namitunaka soki ezalaka wapi. Iyo. Namóná naino likambo ya boye te. Mpe balingaki ete náfuta mpako mpo na chèque moko na moko oyo esilá kopésama na ngai na mibu ntuku mitano oyo, mpo na kofuta banyongo ya mayangani, ná lománde likoló na yango, mpo na ntango elekisi, bomoni, ba-dollar nkóto nkama misato na ntuku mitano na mitano.

23 Nalobaki: “Bóbeta ngai kaka masasi.” Nakofuta yango ndenge nini? Nalobaki: “Mbongo nazali na yango eleki ata ba-centimes ntuku mitano na mitano te.” Nalobaki: “Nakofuta yango ndenge nini?” Mpe bamonisi ngai bwale mibu mitano mobimba.

²⁴ Boye, mpo bato oyo bapesaka makabo na bango. Ndakisa, tozali kosala mayangani, mpe—mpe bato, bayebi kaka ete nkombo na ngai ezali William Branham, bango bakosala chèque mpo na mbongo oyo tokosalela. Batei nde batalaka makambo yango. Ngai natikálá kokongola makabo te na bomoi na ngai. Boye, bango bazuaka. . . Ngai nazuaka li—lifuti uta na losambo na ngai, ya ba-dollar mokama na mpóso moko.

²⁵ Mpe makabo yango. . . Kasi moko na moko, bomoni, oyo batiaka yango na. . . Na ntongo ya mokolo oyo elandi, mo—mo—mo—moto oyo azalaki mokonzi ya likita oyo etali misolo, akoya mpe akoloba: “Ndeko Branham, osengeli kosinié ba-chèque oyo.” Mpe, ee, nazalaki kosinié yango kaka. Akotia yango na kési. Na bongo bango balandélaki yango moko na moko, mpe ngai nasálelaki ata centime moko te mpo na ngai moko. Kasi lokola nasiniaki chèque yango, balobaki ete ezalaki ya ngai. Bato bazalaki kopesa ngai yango, na nsima ngai nazalaki kopesa yango na losambo. Oh, la la!

²⁶ Esalaki ngai mpenza mabe, na ebandeli, na nsima nayaki komona ete moto nyonso, na Biblia, nabanzi, oyo atikálá kozala na mosala ya molimo mpo na Nzambe, azuaki likambo na letá. Bóluka-luka mpe bokomona yango. Ya solo. Mose, Daniele, Yoane Mobatisi. Yesu Klisto akufaki na maboko ya letá, na etumbu ya liwa. Petelo, Yakobo, Yoane, Yoane momónisi, bango nyonso. . . Bango nyonso balekaki na minyoko.

²⁷ Mpo na nini? Ezali efandelo ya Satana. Boyebi yango? Boyebi ete Sátana amatísaki Yesu likoló mpe alakisaki Ye bokonzi nyonso, mokili, na ntango moko boye? Mpe alobaki: “Ezali ya ngai. Nasálaka na yango nyonso oyo nalingi. Omoni? Mpe nakopesa Yo yango soki Ofukameli ngai mpe Okumbameli ngai.” Boye, bomoni banani bazali nkolo na yango? Tobóyaka kokanisa ete ezali bongo mpo na ekólo na biso moko, kasi ezali bongo.

²⁸ Na bongo, Alobaki, Yesu alobaki: “Longwa awa, Satana.” Ayebaki ete Ye moto akosangola yango, na Millenium. Ayebaki ekokóma ya Ye ntango. . . Ntango, soki bikólo oyo ezalaki kokonzama na Nzambe, Millenium elingaki kobanda. Kasi ekozala na ntango moko.

²⁹ Bazali na O.N.U. ná Société des Nations, mpe nyonso wana, mpo na komeka komema kimia. Kasi na ntango nyonso oyo Satana azali likoló na yango, ná politíki, eloko nini ekosalema? Na ntembe ata moke te, bakobunda kaka.

³⁰ Kasi ntango moko ekoya, oyo mandóki nyonso ekotiáma pembeni. Ngonga ya kozímisa móto ekoyúla, mpe ntongo ya Seko ekotána, na kongengá mpe na polele. Mokonzi na biso akofanda na ngwende na Ye. Oh! Tokoyemba banzembo; tokogánga na esengo. Mpe ekozala na bendele bobele moko, libota moko, ekólo moko, tokoloba bobele lokóta moko, ya Likoló. Amen. Nazali kozela ntango yango na motema lúku-luku. Mpe nazali

kopota mbangu mpo náková kuna, natieli Nzambe motema ete mokolo moko, ntango ekosila, náková koloba . . . nakoki koyoka Ye koloba na ngai: “Matá na likoló.”

³¹ Nazali awa na Phoenix na mpokwa oyo na Nkombo na Nkolo. Nako—nakomeka te kolímbola likambo oyo esalemaki. Mingi kati na bino baoyo bozuaka ba-bande, bózanga te kozua oyo ya *Tokómi Ntango Nini, Mesie?* Eteyamaki liboso nálongwa epai na biso. Emononeli moko nde etindaki ngai awa; ezali, nayebi te eloko nini . . . Nayebi te . . . Nazali motéki ya ba-bande te, mpe nalobelaka makambo yango mingi te. Tozuaka yango mpe tozali na mosala ya ba-bande na mokili mobimba. Kino na bazámá minene ná bisika nyonso, bazalaka na eloko moko ya moke oyo batiáka na matói, bazalaka na yango, mpe bakoki kotia yango na bande, kotelema wana mpe bazali kolimbola yango na lokóta na bango. Mpe ekendeke na mokili mobimba.

³² Mpe, kasi ezali na moko oyo nasalaki, ezali *Tokómi Ntango Nini, Mesie?* To, *Nde Oyo Ntango Yango, Mesie?* Mwa . . . Ngai . . . Mokolo ya mpóso na mpokwa, eleki mpóso misato, na losambo. Nsima na ngai komona bimononeli na bomoi na ngai mobimba, natikálá komona eloko ya ndenge wana te liboso, na bomoi na ngai. Mpe nayebi te eloko nini yango ezali. Nazali kaka awa, kasi Ye nde atindaki ngai awa. Nayebi te oyo yango elingi koloba. Ngai . . . Nazali kaka awa.

³³ Mpe nasengeli kozala na bosólo mpe na bosémbo, mpe yango nde nzela bebele moko ya kokende liboso elongo ná Nzambe: ezali kozala sémbó. Mpamba te, bato bakoyeba. Nzambe ayebi, uta na ebandeli, ete ozali te, soki ozali sembo to te. Mpe bato bakoyeba. Mpamba te, mokolo moko, moto moko azalaki koluka kosakola. Mpe Nzambe alobaki . . . To, mosakoli ya solosolo ayebisaki ye, alobaki: “Tómikanisela. Basakoli bazalaki liboso na biso. Bandimaka mosakoli bebele ntango lisakoli na ye ekokisami.” Boye, ekozala malamú mingi koleka tóyeba ete Nzambe nde alobaki bongo, liboso tóloba ata likambo nini na ntina na yango. Tosengeli kozala na bosólo mpe na bosémbo.

³⁴ Sikawa tógumba mitó mwa moke mpo na kobóndela. Sikawa tótia mitungisi nyonso pembeni, mpo na miniti moke oyo ekolanda. Nazali komituna . . . Na etóngá moke kitoko ya bato oyo bazali awa na mpokwa oyo, nayebi ete ezali na mayaka ya motuya oyo bazali awa, baoyo Yesu akoya kozua mokolo moko, baoyo bakolamuka mpe bakobima na putulu.

³⁵ Mpe ekoki kozala na bamosusu awa, oyo bandimisami mpenza te soki bakozala kuna, to te. Bokoki kozala na bosenga ya makambo mosusu. Soki bosenga moko ezali na bomoi na yo na mpokwa oyo, talisa yango epai na Nzambe, wana otomboli kaka loboko, loba kaka: “E Nzambe, Oyebi oyo nalingi koloba sikawa. Mpe pámbola ngai. Na—nazali na bokono. Nazali na bosenga ya lobiko na nzoto. Nazali—nazali motomboki. Nasengeli kozonga

na boyokani na bondeko. Na—nazali na mposa ya kozonga. Na—nabúngaki nzela. Nazali kozónnga. Nalingi ete Ósunga ngai, na mpokwa oyo, mpo názonga.” Nzambe ápambola yo.

³⁶ Tata na Likoló, sikawa wana tozali kobelema na ngwende na Yo, na nzela ya Makila, mpo, Alóna akótaki liboso na—na ebónnga na mawa, azuaki liboso makila na loboko na ye, mpe akendeki liboso, biso mpe, na nzela ya kondima na mpokwa oyo, tozui Makila ya Nkolo Yesu, mpe toyei liboso na ngwende ya Nzambe, na mpiko nyonso, wana toyebi ete tozali na makoki ya koya, ná boyengebene na biso moko te, kasi ná oyo ya Ye. Makila yango ezali kotalisa bopetolami na biso. Mpe nabondeli, Tata na Likoló, ete Ókokisa bosenga na biso.

³⁷ Yambo, tokosenga ete Óyokela biso mawa, limbisa biso bikweyeli na biso nyonso, wana tozali koyámbola mabe na biso, mpe mabunga mike-mike na biso, ná masumu na biso ya nkúkú, mpe masumu na biso oyo eyebani te. Toyamboli mpe, lokola batei, lokola banganganzambe, masumu ya bato. Elongo, Nkolo, tozali makasi. Tolingaka bato. Tomíyokaka lokola Mose, ntango amibwákáki na katikati, mpo na kopekisa nkanda ya Nzambe ébeta bato te. Ezalaki mpenza etaliseli monene, ya boyengebene ya Klisto, ntango Klisto amibwakaki na katikati, mpo na kobikisa bato!

³⁸ Mpe, Tata, biso lokola basali na Ye, ná Molimo na Ye kati na biso, Moklisto nyonso oyo azali awa na mpokwa oyo, atelembi liboso na mosumuki: “E Nzambe, yokela bango mawa.” Toleli mpo na babeli ná bato na bosenga, mpo na maboko ya motuya wana, bamosusu kati na bango mibangé, bamosusu bilenge, mpe bamosusu na mibu ya katikati, batómboli maboko. Oyébi nyonso na ntina na yango, Nkolo. Tobondeli ete Óyanola kokokana na bozui ya nkembo na Yo.

³⁹ Tika ete bato mingi na mpokwa oyo, Nkolo, bábima awa, baoyo bayaki awa na bokono, tika ete bábima na nzoto malamú, bábikisami. Likambo kaka moko ésalema, oyo bakokoka ata kolimbola yango te, kasi báyebe ete babiki.

⁴⁰ Tika ete baoyo bazali batomboki bábima basili kosémbolisama, Nkolo, báyebe ete basili kozonga mpe kozua lisusu Klisto esika oyo batikaki Ye. Tika ete bákende kozongisa biloko ya bato. Sálá, Nkolo, ete baoyo bayá naino te bámona bonsómi ya motuya wana ya kozala nsómi, bákangolama na boloko yango, bákangama lisusu te na biloko ya mokili ná mitungisi ya bomoi oyo, kasi bákóma nsómi kati na Klisto. Sálá yango, Tata.

⁴¹ Pámbole nyonso oyo tozali na bosenga na yango sikawa, mpe pámbola Liloba na Yo ná mosali na Yo, mpe tokosanzola Yo. Na Nkombo na Yesu nde tosengi yango. Amen.

⁴² Sikawa, soki tosengeli kotánga eteni moko ya Makomi, to Likomi moko lokola motó ya liteya, nde, Bakolinti ya Liboso

mokapo ya 14, molongo ya 8, ekomami boye, na Bakolinti ya Liboso 14:8.

Soko kelelo elobi polele te, nani akosélingwa mpo na etumba?

⁴³ Eteni na likomi oyo ekoki mpenza mpo tókoka koteya mpóso mibale likoló na yango, mpe ata bongo kokóma ata moke te na nsuka na yango. Ezalaka na eloko moko na Liloba oyo epémélámá. Okolekisa ntango nyonso likoló na eteni ya likomi moko wana. Bokoki kokangisa Biblia mobimba ná yango. Ezali ya solo.

⁴⁴ Mokolo moko, moto moko atúnaki ngai, alobaki: “Ndenge nini ozuaka kaka eteni ya likomi moko wana?”

Nalobaki: “Oh, la la! Okoki kokamata lisolo ya nyonso oyo ezali longwa na yango.”

⁴⁵ Nalokotaki litíti moko ya nkasa misato oyo ezalaki na mabelé, mpe nasimbaki yango. Mobali yango azali awa na mpokwa oyo, afandaka na Tucson. Tozalaki na Pasadema, na Californie. Nalobaki: “Nakoki kozua lititi ya nkasa misato oyo mpe koteya mibu ntuku mibale na mitano likoló na yango: ndenge ezali na bomoi, oyo ezali kati na yango; ndenge, nkasa misato yango ezali bosáto kati na Moko. Mpe, oh, oh, ezali mpenza na makambo mingi oyo tokoki koloba na ntina na yango.”

⁴⁶ Bongo boni mpo na Likomi? Ezali Liloba na Nzambe. Ezali ya Seko. E—ezalaki na . . . Ezalaka na nsuka te. Ekóbaka kaka kokende liboso, liboso, liboso. Ezali ekímelo mpo na biso.

⁴⁷ Sikawa, na mpokwa oyo, nalingi koloba likoló na: *Kelelo Elobi Polele Te*.

⁴⁸ Nazalaki kokanisa yango, kala mingi te, ntango nazalaki kokanisa na ntina na . . . likambo ya mpako wana, namilobelaki: “Lelo oyo, eloko ya sikisiki mpenza ezali te. Eloko nyonso ekomi kozanga kozala sikisiki.” Mpe eloko nyonso oyo ezali ya sikisiki te, ekoki kotielama motema te. Eloko nyonso oyo ezali ya sikisiki te, ekoki kotielama motema te. Zalá mosika na yango, soki endimisami mpenza te.

⁴⁹ Soki ozali na mombongo; mpe, kutu, tozali na bato ya mombongo awa, ntango mosusu bazali mingi. Soki ozali na mombongo oyo ezali sikisiki mpenza te, okotiela mpenza mosolo mingi te, mpamba te li—lifuti ezali mpenza sikisiki te, mpe okokótisa mosolo mingi na mombóngo yango te. To, soki ozali moto moko malamú, makasi na mombongo, okozela mpe okoluka-luka, soki ozali na mwa mbongo ya kobalola, kino ntango okomona eloko oyo ondimisami mpenza na yango, eloko oyo okoki kotiela motema, eloko oyo okoki kotálela. Mpamba te, okolinga te kobúngisa mwa mbongo oyo osili komíbómbela, mpamba te ná yango nde osengeli kobíkela, na lifúti kolongwa—

kolongwa na matómba oyo ekoúteki na kosala mombóngo yango. Ee, osengeli ko—kozua eloko moko mpo na kobika na yango.

⁵⁰ Mpe mwa mbongo oyo omíbómbelaki, kotia yango na libénga na yo te mpe kotika yango kuna te, mpo miyibi bakoyiba yango. Bomoni? Te, kosala bongo te. Soki ozali na yango, kólisa mbongo yango na eloko moko boye. Na nsima, osengeli mpenza kondimisama na eloko okosála mpo na kokolisa mbongo na yo. Soki ondimisami te, ee, kokótisa mbongo na yo na eloko wana te, ata moke te.

⁵¹ Boye, na ntembe te, mombongo ezali kotenga-tenga mingi na mpokwa oyo. Pene na mimbongo nyonso na mokili ekómi mpenza kotenga-tenga, mpo mokili ekómi mpenza kotenga-tenga. Okoki te komipesa nzela . . .

⁵² “Sikawa, nakobómba mbongo *boye*, mpo námitongela mwa ndako moko ya kitoko na esika boye.” Oyo wana, ezali mpenza sikisiki te, nakoyebisa yo yango, mpo gouvernement ekoki kobótola nyonso wana, na mokolo moko.

⁵³ Oh, makambo yango nde esili kobébisa mpenza demokrasia na biso na lolenge ete ezali lisusu na sikisiki te! Kalakala tokokaki kotiá motema na demokrasia na biso. Mpe, oyo, namonaka mpenza ete ezali lolenge ya gouvernement malamuni koleka te. Kasi, ata bongo, demokrasia na biso ezali kotengatenga. Mpamba te, biso, ekólo oyo, bato na biso, tozali na mobeko-likonzi, mpe mobeko-likonzi yango nde—nde etemelo na biso ya nsuka. Kasi, ata bongo, kati na yango, mobeko-likonzi na biso ezali na sikisiki te, mpo basílá kobuka yango mbala mingi. Nkóndó M. Roosevelt abukaki yango nde kobuka. Boye, bomoni, bomoni ete bakoki kobuka yango. Bokoki kotiela yango motema mpenza te.

⁵⁴ Politiki, oh, la la, ndenge ezali mpenza kotengatenga! Bato baswánaka, baswánaka, mpe baswánaka, na ntina na politiki. Bazalani bakoswanaka, na ntina na yango, bato oyo bazaláká liboso baninga malamuni. President moko akoya, to moto oyo akolinga kokóma sherif, to eloko moko boye, mpe moto mosusu ya ngámbo mosusu na politiki, mpe bakowélana bamoko na bamosusu kino koswana na ntina na yango, politiki. Mpe na . . . nabanzi ete nazoyokisa moto moko mpasi te, kasi nakanisi ete mobimba ya likambo yango esili kopola. Bomoni? Iyo, misie. Boye, mpo na nini kowélana mpe koswána na ntina na likambo moko oyo ezali na yango na ntina te? Ya solo. Ekómi mpenza mabe mingi.

⁵⁵ Moto moko alobaki na ngai mokolo mosusu wana, alobaki: “Okó—okovoté na maponami oyo?”

Nalobaki: “Ngai nasílá kovoté.”

Alobaki: “Oh, na maponami oyo?”

⁵⁶ Nalobaki: “Navotaki Yesu.” Nalobaki: “Yoka. Bato mibale basengelaki kovoté mpo na ngai.” Nalobaki: “Nzambe avotaki ngai, kasi zabolo avotaki ngai te. Mpe ngai navotaki Nzambe, boye navotaki malamumu.” Ndenge okosukela, ekotala moto oyo okovoté mpo na ye.

⁵⁷ Boye, bótala, kala mingi te, kaka mpo nátalisa bino mwa likambo moko, na nsima tokotika yango. Na maponami ya president oyo euti koleka, ntango etalisamaki polele na Chicago ná bisika ndenge na ndenge, ete ba-masíni oyo bazuaki mpo na kovoté na yango, esilaki kobongisama na ngambo oyo ya parti ya ba-Democrate, ete ntango nyonso oyo bozalaki kovoté M. Nixon, bosengelaki kovoté M. Kennedy, na ntango yango moko. Boye, bozali na libaku malamumu moko te. Mpe etalisamaki polele!

⁵⁸ Mpe boyókaki na *Moniteur* na mpokwa mosusu wana, ntango basálaki so—sondage na ekólo mobimba, kobanda na Mississippi, na esti. Bavotaki M. Nixon mbala minei likoló na mitano, na kobénga na nzela ya nsinga. Ndenge nini moto akoki kolóngá? Soki ézalaka M. Kennedy, elingaki kozala ndenge moko. Ngai nakótelaka partí ata moko te.

⁵⁹ Partí na ngai ezali na Lola, mpe nazali elongo ná bango awa, na mpokwa oyo. Tofandi na bisika ya Likoló, kosololáká na ntina na Mokonzi na biso.

⁶⁰ Kasi, bomoni, nazomeka koyebisa bino ete makambo ya mokili oyo ezali kotenga-tenga. Ezali te na . . . okoki kotiela yango motema te. Ezalaka sikisiki te. Mpe eloko nyonso oyo ezali sikisiki te, malamumu názala mosika na yango. Nasepelaka na likambo ya mabe wana te. Nasepelaka komisangisa na ngámbo ya mabe te. Nasepelaka na oyo ya malamumu, kozala na ngámbo ya malamumu.

⁶¹ Sikawa, bomoi na libota ezali lisusu sikisiki te. Boyebi, natangaki likambo moko mokolo mosusu wana, na moko na bazulunále epai moko boye, ete motángó ya koboma mabála na Amerika ezali likoló koleka bikóló mosusu ya mokili. Mpe biso tosengelaki nde kozala ekólo ya basambeli. Iyo, tokokaki kozala bongo, losambo, malamumu, kasi ezali lolenge ya malamumu te. Bomoni? Losambo ezali kaka ezipeli. Ezali mpasi koloba eloko nini tosálelaka lokola ezipeli na biso. Adama amekaki komisálela ezipeli uta na nkasa ya mosuke, kasi esimbaki te. Ezalaki sikisiki ata moke te, ntango asengelaki kobima kokutana ná Nzambe. Boye, religion ekokutana na yango ata moke te. Kasi bokoki kokanisa ete motángó na biso ya koboma mabála ezali likoló koleka—koleka oyo ya bikólo mosusu nyonso, motángó na biso ya koboma mabála? Tomoni ete makambo ya nsoni ezali komata na mabota na biso.

⁶² Ekamwisaki mpenza komona, ete, motángó mingi ya bato, na sondage yango, na ekólo mobimba, mpe na . . . Nabanzi ezalaki na Ohio, nde sondage moko esalemaki na ntina na Boklisto, mpe

ezalaki nsómo, komona motángo ya bato oyo bakendeke ata na losambo te. Na nsima, pene na bato ntuku mwambe likoló na mokama oyo bakendeke na losambo, bayebaki te mpo na nini bakendeke kuna. Bayebi te mpo na nini bakendeke. Bakendeke na bango kaka na losambo.

“Bokendeke mpo na nini?”

⁶³ “Ee, mama azaláká komema biso, ntango tozalaki bana mike, mpe biso tozali kaka kokoba kokende.” Na—na nsima, motángo mosusu ya bato balobaki ete bakendeke kuna kaka, oh, mpo na kokútana ná bazalani na bango mpe kosolola mwa moke. Bomoni?

⁶⁴ Ee, ezali nsómo! Kokamwa te ete bomoi na mabóta ebebi mpenza, bomoni, bomoi ya mabota nyonso oyo etemi ngwi te.

⁶⁵ Mwasi nyonso oyo alingi kobalana ná mobali moko, mpe andimisami mpenza na mobali yango te, ekozala malamumu ete átika mobali yango kimia. Mpe mobali oyo alingi kobalana ná mwasi moko, mpe andimisami mpenza te, ekozala malamumu ete ótika mwasi yango kimia. Ekozala malamumu ete óbondela na etingya, na ntina na yango, kino Nzambe akopesa yo eyano. Na bongo, oyo Nzambe asangisi, moto moko te ákabola yango. Kasi biso—bisu, tosengeli liboso kobóndela na etingya, na ntina na likambo yango. Iyo.

⁶⁶ Sikawa, tomoni ete tomekaki kobóngola mokili na nzela na manáka ya kelasi, kasi tosali mpenza potopóto na likambo yango, ya solo mpenza. Bokoki kobóngola mokili na Klisto na nzela na mayele ya kelasi te. Kelasi ebéndaka moto mosika na Nzambe, koleka ndenge ebéndaka ye epai na Nzambe, mpo alukaka kokanisa ete azali na mayele mingi mpe ayebi mingi koleka moto mosusu. Ata kelasi ezali malamumu, Klisto atindaki ata moke te ete lingomba na Ye kotangisa mokili kelasi. Ye atikalá kotángisa bango kelasi te, ete básala mákindó. Ata moke te atángis- . . . Ezali na yango mabe te. Ayebisaki bango ata moke te ete bákende kotonga ba-lopitalo. Ezali na yango mabe te.

⁶⁷ Kasi mosala ya Lingomba ezali koteya Nsango-malamumu. “Bókende na mokili mobimba, koteya Nsango-malamumu na bikelamo nyonso.” Bomoni? Kasi nyonso oyo ekesani na yango ekomaka koningana, mpamba te ezali libanda na mwango ya Nzambe.

⁶⁸ Bomoi ya ekólo ekomi sikisiki te. Ee, mokili ekomi sikisiki te. Tokómi kobika na esika oyo mokili mobimba ekómi na motema likoló-likoló, ekómi lokola, nyonso ekómi kotenga-tenga. Bikólo nyonso, bato nyonso, moko azali kobanga mosusu. Bákolobela kimia.

⁶⁹ Kalakala, na eleko moko, bazalaki koloba: “Oh, ntango tokosilisa kobunda Etumba ya Liboso ya Mokili mobimba, bana na biso nyonso ya mibali basengeli kokende kuna, yango nde

ekosilisa bitumba.” Ee, molinga ya masasi esilaki naino kutu na mopepe te, na mbala moko etumba mosusu ebandaki.

⁷⁰ Na nsima, basalaki Soci  t   des Nations, mpo   zala police ya mokili, kasi epanzanaki. Sikawa bazali na O.N.U, kasi ezali kaka ndenge moko. Esili kokweya. Ezali na eloko moko te.

⁷¹ Nyonso ek  mi kotenga-tenga; bomoi ya ek  lo, bomoi ya politiki, ba-masini ya kovot  . Oh, la la! Ek  mi mpenza... Likambo yango mobimba ek  mi kotenga-tenga, nyonso.

⁷² Sikawa nalingi komema yango kotalisa oyo es  lemaka awa n   biso. Bomoni? Bomoi ya lingomba ek  mi kotenga-tenga mpe ezali sikisiki te. Sikawa, yango nde Polo azalaki kolobela. Bomoni? Yango nde alingaki koloba: “Soki kelelo elobi polele te.” Bomoi ya lingomba ek  mi kotenga-tenga. Bato bayebi malamau mpenza te likambo nini ya kosala. Bakendeke, kotelengan  k   longwa na lingomba moko kino na mosusu, koluka koyeba oyo wapi ezali na likambo ya malamau; longwa na likonzi moko kino na mosusu, mpo na koluka koyeba oyo ezali malamau, epai malakisi ya malamau ezali. Mpe moto moko akoya wana, mpe akoki kolimbola yango, na lolenge ete endimeli na bango ezali mpenza solo. Na nsima, na mbala moko, bamoni makambo mingi ya libebi na kati na yango, na lolenge ete bakei komeka lingomba mosusu, kotala oyo bindimeli, malakisi na bango ezali. Oh, na nyonso wana, boye tomoni ete tosili kokabwana mpenza, n   makambo yango, na milongo nkama na nkama ya mangomba ekeseni. Sikawa, ezali na eloko moko te ya kot  lemela yango. Ezali kaka ete mpo b  koka kosala makambo mosusu, na nsima, kosala oyo basalaka, mpe esengeli kozala na eloko moko ya malamau kouta na yango, esika moko boye.

⁷³ Kasi, omoni, okoki kotia motema te mpo na koloba ete: “Nas  mbelaka na lisanga ya mangomba Metodiste, mpe na-nam  yokaka malamau mpo nas  mbelaka kuna.” “Na-na-nas  mbelaka na lisanga ya ba-Batiste, mpe nam  yokaka malamau.” Okoki kosala bongo te.

⁷⁴ Okoki ata kosala bongo te na ntango olobi ete “os  mbelaka na lisanga ya mangomba ya Pantekote.” Okoki kosala bongo te. Osengeli kosala bongo te, mpo ezalaka bongo te. Tomoni ete ntango lisanga na biso ya liboso ya ba-Pantekotiste, Conseil G  n  ral, etiamaki na molongo, eumelaki te, kino bak  maki kokabwana na oyo *kuna*, mpe kokabwana na oyo *awa*, n   kow  lana, n   malakisi. Sikawa b  tala yango, bipai nyonso. Bomoni? Ezali kolakisa ete ezali sikisiki te. Baoyo bati  ka motema kaka na ebongiseli, e-ezali sikisiki te.

⁷⁵ Sikawa, bokoloba: “Ndeko Branham, ozokotisa biso na likambo moko ya mpasi awa. Ozali koyema eloko moko ya molili ya nsomo.” Mpe yango nde nazalaki na mposa ya kosala. Nazalaki na mposa ya kosala bongo.

⁷⁶ Nasalaki yango na ntina, mpo nákoka koloba boye. Eloko moko ya sikisiki ezali? Iyo. Ezali na eloko moko ya sikisiki. Oh, nazali na esongo mpenza, ete ezali na eloko moko oyo bokoki kotiela motema, mpe kondimisama ete ezali solo. Oh, na ntango oyo makambo nyonso mosusu ekosila koleka, *Oyo* ekozala kaka kotelema ngwi. Soki botángi Santu Matai 24:35, Alobaki: “Likoló ná nsé ekoleka, kasi Liloba na Ngai ekokweya te.” Nzambe azali na mobóko ya sikisiki.

⁷⁷ Mobange mobali moko alobaki mokolo moko, mobange mobali moko ya moindo na Súdi. Azalaki kotambola ná Biblia, kasi ayébaki na ye kotánga te. Balobaki na ye: “Mpo na nini otámbolaka ná yango, Sam?”

⁷⁸ Alobaki: “Ezali—ezali Biblia Esantu.” Balobaki: “Ekomami likoló na Yango.” Mpe alobaki: “Nandimaka Yango, banda ’zipeli ya likoló kino ’zipeli ya nsima, nandimaka mpe ezipeli yango,” alobaki bongo, “mpamba te ekomámí ‘Biblia Esantu’ likoló na yango.”

⁷⁹ Mpe mobali oyo azalaki kosolola ná ye, alobaki: “Ondimaka na yo te nyonso oyo ezali kati na Yango?”

Alobaki: “Iyo, misie. Na ntembe te, nandimaka yango.”

⁸⁰ Alobaki: “Sikawa, ee, olingi koloba ete okosala nyonso oyo Biblia elobaki kosala?”

Alobaki: “Iyo, misie.”

⁸¹ Alobaki: “Bongo soki Biblia yango elobaki ete Sam ápumbwa mpe áleka na nzela ya etutú ya mabanga *wana* kuna? Okosala nini?”

Alobaki: “Nakopumbwa.”

⁸² Alobaki: “Ee, sikawa, okoleka ndenge nini na etutu ya mabanga oyo ezangi lidusu kuna?”

⁸³ Alobaki: “Soki Biblia elobaki ete Sam asengeli kopumbwa, lidusu moko ekozala wana ntango Sam akokóma wana.” Boye, oyo wana, ezali mpenza ndenge wana. Lidusu moko ekozala wana.

⁸⁴ Eloko bobele moko oyo osengeli kosala ezali ete ótelema likoló na Liloba na Nzambe, mpe Nzambe akofungola nzela mpo na oyo etikali. Oh, Mobóko monene wana!

⁸⁵ Nabanzi ete Alobaki, na Luka, nabanzi ezalaki yango, epai Azalaki kokita ngomba, Alobaki na bayekoli: “Bato balobaka ete Ngai Mwana na moto nazali nani?”

Moko alobaki: “‘Yilimia,’ mpe ‘basakoli,’ mpe bongo na bongo.”

Mpe Alobaki: “Kasi bino bolobaka ete Ngai nazali nani?”

⁸⁶ Na ntango yango nde Pételó alobaki maloba ya motuya wana ete: “Ozali Klisto, Mwana na Nzambe na bomoi.”

⁸⁷ Alobaki: “Esengo na yo, Simona mwana na Yona, mpo mosuni ná makila nde emonisi yo yango te. Kasi Tata na Ngai oyo azali na Likoló nde amonisi yo yango. Mpe likoló na libanga oyo nde Nakotonga Lingomba na Ngai, mpe bikuke na ewelo ekolónga Yango te.”

⁸⁸ Boye ezali eloko nini? Likoló na sóló oyo emonisami ya Liloba na Nzambe. Mpamba te: “Na ebandeli Liloba ezalaki, mpe Liloba ezalaki elongo na Nzambe, mpe Liloba ezalaki Nzambe. Mpe Liloba ekómaki mosuni mpe efandaki elongo na biso.” Mpe emonisamaki na Petelo ete wana ezalaki Liloba na Nzambe litatolami. Amen.

⁸⁹ Yango nde ntina Akokaki koloba: “Nani akoki kokweisa Ngai na ntina na lisumu? Nani akoki kofunda Ngai? Nyonso oyo Liloba ekomá na mpo na Ngai, Nasali yango.” Nzambe asilaki kotatola yango, ete Azalaki Liloba. Oh, yango mpenza. Nzambe asili kotalisa polele, Liloba elobi bongo, na bongo Nzambe akokisi yango, asali ete ékokisama, alakisi yango.

⁹⁰ Na mibu eleki, ntango bazalaki koloba na lingomba: “Libatisi ya Molimo Mosanto ezalaka te, wana ezali kaka liyóki ya nzoto oyo bato bamisalelaka bango moko,” kasi baoyo bayambáki Yango, bayébaki ete ezalaki solo. Bayébaki ete Nzambe azalaki mpenza sóló. Mpe etalisamaki polele, na lolenge ete, lelo, mosala ya Nzambe na ba-Pantekotiste na mokili mobimba, ememi bato mingi epai na Klisto koleka bamosusu nyonso.

⁹¹ *Mopaya Na Bisó Ya Lomíngo*, eleki ntango molai te, zulunále ya ba-Katoliko, elobaki, nabanzi ete ezalaki mobu moko liboso na oyo eleki, to na mobu oyo eleki, moko na yango, ete: “Lingomba Katoliko ezuaki bandimi ya sika bobele ndambo ya milió. Nzokande, ba-Pantekotiste bazuaki bandimi ya sika milió moko ná nkóto nkama mitano.” Amen.

⁹² Ezali nini? Ezali eloko oyo ezali kokóla, Liloba na Nzambe, kopalangánáká na mikili ya bapaya. Tosengelaki mpenza kozongisa matondi mingi! Ezali kosalema mingi, na lolenge ete, ata sikawa ba-Episkopalien, ba-Presbiterien, ba-Lutherien, ná bango nyonso, bakómi koya kozua ndambo na Yango. Bomónaka ete na mayangani ya Bato na Mombongo, boyokaka bango kolobela bitónge ndenge na ndenge: ba-Episkopalien, ba-Lutherien, ba-Presbytérien. Ee, ekómi mpenza mpasi mpo na koyoka ete Pantekotiste moko azali kosala lisusu likambo moko boye. Ya solo. Ekómi kaka bato mosusu. Ezali mpo na nini? Basili komona bolembu ya bindimeli na bango, mpe bazongi na Liloba. Kuna nde epai mobóko ezali, eloko oyo ekoki koningana te.

⁹³ Tomoni kuna, Molimo Mosanto azali kobika Bomo na Ye kati na bato, komitalisáká Ye moko na mokili. Mpe ekómi kopesa bato mposa na Ye: Liloba na Nzambe oyo eninganaka te, oyo etyelamaka ntembe te, etalisami mpe azali komilakisa Ye moko,

Liloba Yango moko ezali kobikama na nzela na bomoi ya moto. Likambo moko ya malamu mpenza! Eloko moko te ezangi kozala polele ná yango. Bokoki komona esika oyo Nzambe apesaki elaka, mpe yango oyo, ezali kotalisama polele. Eleki mibu nkama na nkama, basakoli balobelaki yango, mpe awa tozali komona yango kokokisama.

⁹⁴ Katikati na matóngí nyonso, katikati na bokeseni nyonso, katikati na bindimeli nyonso, bamekaki mpenza konyata Liloba na Nzambe! Bamekaki kotia mayele ya kelasi na esika na yango. Bamekaki kotia eloko mosusu na esika na yango, kosala denomination. Bangó moko bazuaki mobulu. Mpe na nyonso wana, Liloba na Nzambe ezali kaka kopela mpe kongenga ndenge atikálá kozala. Ezali nini? Ezali eloko oyo ezalaka mpenza sikisiki. Nzambe alobaki: “Likoló ná nse ekoleka, kasi Liloba na Ngai ekokweya te.” Na bongo, yango nde eloko oyo ezali mpenza sikisiki. Soki olingi komitiela lóngo, tiá lóngo ya Liloba wana kati na motema na yo.

⁹⁵ Dawidi alobaki ete azalaki kobomba Yango na motema na ye, mpo ásala lisumu te. Akomaki mibeko na Ye na makonzi ya mbeto, mpe akangáki yango na maboko na ye mpe bisika nyonso, azalaki ntango nyonso kotia Liloba na Ye liboso na ye. Lolenge wana nde. Bâtelaka makanisi na yo ntango nyonso . . .

⁹⁶ Nzambe alobaki na Yoswa: “Kobaluka na loboko ya mobali to na loboko ya mwasi te, uta na Yango. Na yango nde banzela na yo ekofuluka. Na bongo nde okozala na elónge.”

⁹⁷ Mpe ntango lingomba mobimba ekosangana mosika na bindimeli na yango, mpe ekotelema likoló na Liloba na Nzambe, na ntango wana nde lingomba ekozala na elónge. Yango nde eloko oyo ekonyata communisme.

⁹⁸ Eloko nini esalaki communisme . . . ? Eloko yango mpenza, bino bokanisaka “communisme,” na ntango oyo bazali kopanza nsango na bango, mpe kokóla mbangu, ná ba-milió, mpe bato bazali kobanga yango: communisme wana ekolimwa mpe ekokufa. Esengeli kosalema. Communisme, bakoki kosala *boye*. Bakoki kosala *bongo*. Nandimi ete Nzambe akosalela yango, kasi, ezali solo, kaka ndenge Asalaki na Nabukadanesala. Akopupola, ma—ma—ma . . . matiti mabe nyonso, ná communisme. Kasi, yango . . . Te, likambo te. Kasi, bótala. Kasi eloko yango, communisme, ekosuka. Communisme ekokóma na nsuka na yango.

⁹⁹ Kasi Liloba na Nzambe ezali na nsuka te, mpo Ezalaki na ebandeli te. Amen. Ezali Seko elongo ná Nzambe. Mpe soki otii lóngo, mpe Liloba etii lóngo kati na yo, ozali Seko elongo ná Liloba. Amen.

¹⁰⁰ Esengeli kokóma na nsuka na yango. Biloko nyonso wana ezali koningana-ningana. Ata batongi likonzi ya monene ndenge nini, esengeli kokweya. Makambo nyonso oyo ezalaka te, oyo

etelemelaka Liloba wana, to ekeseni ná yango, ekosengela kolongwa. Ekosengela kotika esika, mpo Liloba ezali koya ná elónɡa. Eloko moko te ekoki kopekisa Yango. Nzambe asili koloba bongo.

¹⁰¹ Soki Alobi Yango, likoló ná nsé ekoleka, kasi Yango ekokweya ata moke te. Bómba Liloba yango na motema na yo, kozua mpenza Liloba yango mpe kotika Yango ékóla. Bátela Yango na makanisi na yo, ntango nyonso, mpo Ekokweya ata moke te. Liloba na Nzambe ekokweya ata moke te, mpo Alobaki ete Ekokweya te. Boye tolingi kokangama na likambo yango.

¹⁰² Sikawa, Polo alobaki, na Makomi, lokola koyekolisa sodá, sodá lolenge ya koyeba loláká moko boye. Sikawa, soda asengeli koyekola ndaka ya . . . ya koyúla to ya kelelo. Ayebi te soki kelelo elobi, eyúli, soki ezali mpo na—mpo na kokende liboso to kozónɡa nsima. Soki ayebi na ye bokeseni yango te, bokozala na mampinga ya mobúlungano ya ndenge nini? Na ntembe te, mongúna akolónɡa etonga ya ba-sodá oyo bayékolisama malamumu te koleka oyo wana. Amen.

¹⁰³ Yango nde likambo ya mangomba na biso lelo. Toyekolisi bango bindimeli, kokesana bamoko na bamosusu.

¹⁰⁴ Tosengeli kosangana. Tosengeli koyeba kelelo. “Na bongo, kelelo ezali eloko nini?” balobaka. Kelelo ya Nsango-malamumu, wana nde Yango. Liloba ya Nzambe na bomoi ezali Kelelo. Bósangisa eloko moko te ná Yango.

¹⁰⁵ Koyebisa moto moko te ete ábeta Harmonica, mpe oyo mosusu ábeta mondule. Moto moko te ayebi nini kosala. Epésaka mobulu.

¹⁰⁶ Mpe Polo azalaki koloba na ntina na koyekolisa moto koyeba loláka. Mpe kaka ntango loláka wana ebétámi, ayebi mpenza eloko ya kosala, mpo mobeti mondule azuaka mitindo, uta na kapiteni mokonzi. Mpe ntango ayuli kelelo oyo, mampinga bayebi malamumu mpenza esika oyo basengeli ko—kokende liboso, mpe esika basengeli kozonga nsima, mpe soki basengeli kobaluka na loboko ya mobali to ya mwasi, to oyo basengeli kosala, na boyúli kelelo.

¹⁰⁷ Sikawa, mapinga, etumba, ezalaka ntango nyonso etumba. Tomibakisaka ata moke te na Lingomba, to komikotisa na kati ya Lingomba, koya na pike-nike. Tosengeli kosósola ete tozali koya na esika ya etumba.

¹⁰⁸ Ngai nayaka ata moke te mpo bato básimba-simba ngai na mokongo mpe báloba: “Ndeko Branham, ozali moto malamumu mingi.” Te, mesie. Nayáka wana ná nguba. Nazali na bosenga ya nguba te mpo na yango. Nayáka ná ekoti mpe bibundeli. Nayáka kobunda, kobundela centimetre moko na moko ya mabelé.

109 Nzambe ayebisaki Yoswa: “Esika nyonso oyo matámbe na bino ekonyata, Napesi bino yango.” Boye, matámbe elingi koloba bozwi.

110 Mpe soki lingomba ekómi na esika oyo ekómi kosala boyókani ná bindimeli, mpe kokakola Liloba, mpe kosala boyókani ná mokili, nalingi koloba, na ntango wana ezali kolóngama. Ezali kozónga nsima.

111 Oyo tosengeli na yango na mpokwa oyo ezali ba-sodá bázua bilaka nyonso ya Biblia oyo, oyo Nzambe apésáki na Lingomba, bibundeli nyonso ya Nzambe, mpe kotelema ngwi. Yangó nde eloko oyo tosengeli na yango, ba-sodá; ezali te koláta uniforme mpo na kosala defilé, ezalaka ntango nyonso ndenge mosusu. Ntango moto . . .

112 Ekólo nyonso, tozali na banóngi na bikólo nyonso. Tozali na banóngi ya Allemagne awa. Tozali na banóngi ya Angleterre awa. Tozali na—tozali na banóngi kuna na Angleterre. Bango bazali koluka kosala nini? Bazali koluka koyeba lolenge ya bisalelo, lolenge ya bombe, oyo mosusu azali na yango. F.B.I. ezali pene na bikólo nyonso, tóloba. Bazolandela mpo bámona. Ndenge wana nde bakóbaka kobika. Balandelaka mpo bámona lolenge ya bombe nini, oyo mosusu azali na yango. Na nsima bayáka awa mpe bakómisaka yango mwa malamú koleka, to basalaka eloko moko mpo na kotelemela yango. Batiélanaka motema bamoko na bamosusu te, na bikólo yango, mpamba te yango elakisaka ete bikólo ezali kotenga-tenga. Ee, Angleterre ekoki kopanza biso, na ngonga moko, soki tokátisi nzela na bango, to biso nde tokopanza bango. Esengaka na yango kaka moto moko kuna na likoló, ámela kaka mwa kopo moko to mibale, to áswana mpo na likambo moko, mpe na mbala moko, ebandi.

113 Awa, eleki ntango molai te, bazalaki koloba, na ntina na biloko mike-mike, ete, “Esalemi na Japon,” na eleko ya etumba. Bazalaki kobamba yango na mabelé, mpe koleka pembeni, mpo na bolingo ya ekólo. Sikawa, okofúta mbongo ebele koleka mpo na yango, koleka nyonso oyo osombaka na kati ya ekólo. Likambo nini esalemaki? Yangó nde ekofuta bomoi ya bilenge mibali oyo bakúfaki kuna? Ata moke te.

114 Ezali nini? Ata obundi ndenge nini mpo na biloko ya mokili, okokende, ezali na ntina te. Ekotenga-tenga. Kasi etumba moko ezali, oyo okoki kokóta kuna mpe kolónge eteni ya mabelé oyo bakoki lisusu kobotola yo yango te. Yangó ezali loláka ya Nsango-malamu ya Kelelo ya Liloba na Nzambe, mpe ezali na makabo ná bilaka oyo Apésáki na Lingomba. Na ntembe te. Sikawa, tomoni—tomoni, loláka oyo kelelo yango ezali koyokisa.

115 Sikawa, ekólo nyonso elukaka kopesa na ba-sodá na bango bibundeli ya komibatela ya malamú koleka oyo bakoki kozala

na yango. Sikawa, nayebi, bantango mosusu bibundeli yango ezalaka pete te mpo na komema.

¹¹⁶ Nazalaki na ndeko moko, bazalaki kobenga ye “Rookie,” akendeki kuna, mpe mampinga bapesaki ye sáki moko ya kilo ntuku minei mpo ámema yango na mokongo. Ezalaki pene na bozito ya nzoto na ye moko. Bapesaki ye páwu, mpo átimola na yango libulu; mpe bondóki, ná ba-grenade ebele ya maboko. Mpe, oh, namóná naino liboke ya ndenge wana te! Ezalaki mpenza mpasi mpo na mwa elenge mobali yango áningana. Na nsima, bamemaki ye na nzela mpo átambola kilomètre mwambe na makolo. Elingaki koboma ye. Alobaki: “Bozoba oyo eza mpo na nini? Mpo na nini nasengeli na mobange ya ekoti monene oyo?” Sikawa, bótala. Mampinga eyebi ete akozala na bosenga na yango na ntango moko. “Mpo na nini názala na mposa ya páwu, awa na nzela monene, ntango nakotambola?” Malamu ómesana kosalela yango. Okoki kozala na bosenga na yango.

¹¹⁷ Gouvernement ekokabola eloko moko te, soki boyebi te. . . bayebi ete bokosengela kosalela yango. Bosengeli komilengela mpo na yango. Balukaka biloko ya malamau koleka oyo bakoki kozua, mpo na kobatela yo ná yango, mpamba te balandelaka makambo ya ekólo. Mosala na bango ezali ya kobátela bino malamau mpenza, mosika na masasi. Ezalaka ntango nyonso bongo.

¹¹⁸ Ebandaki na elanga ya Edene. Mpe Nzambe aléngelaka Lingomba na Ye. Mpe. . .

¹¹⁹ Boyebi, biso tosengeli ntango nyonso kokómisa makambo malamau koleka. Sikawa, bampépo ya kala oyo tozaláká kosalela na Etumba ya Liboso ya Mokili mobimba; na Etumba ya Mibale ya Mokili mobimba, ee, mwa bampépo yango na mipepe esilaki mpenza ngala, ntango basalaki bampépo kitoko ya minene koleka oyo bazalaki na yango. Ee, baoyo wana ekómaki mpamba. Sikawa, oyo bauti kosalela na etumba oyo euti koleka esili kokoma ya kala. Bazali lisusu na bosenga na yango te. Basáli bampépo oyo ya réaction. Mpe, bomoni, bazali ntango nyonso komeka kosala malamau koleka, kosala malamau koleka mpo na komibatela.

¹²⁰ Kasi boyebi nini? Nzambe azali na ntina ya kosala ya malamau koleka te. Nzambe apesaki bana na Ye, ba-sodá na Ye, eloko ya malamau koleka oyo ekokaki kopesamela bango. Ntango Apesaki bango, Apesaki bango eloko nini? Apesaki bango Liloba na Ye na elanga na Edene, mpe moto asengelaki komibatela nsima na Liloba na Nzambe, mpe molimo mabe moko te ekoki kosimba ye. Tikálá na kati ya Liloba.

¹²¹ Sikawa, monóngi moyini, Satana, alukaki koyeba eloko nini akokaki kosala mpo na komikotisa na kati na yango. Boye, a—ayebaki ete akokaki kaka kobima te mpe kokósa ye, boye, eloko bobele moko oyo akokaki kosala ezalaki komema ye na mabánzo.

Mpe yango nde eloko oyo Nzambe azali kosalela lelo, mpo na kobátela Lingomba na Ye, ezali Liloba na Ye. Mpe Satana ayáka na nguya ya mabanzo. Satana ayébaki ete yango nde ezalaki libulu ya kokótela. Yango nde esika oyo bato bakokwéya na bopete nyonso, na mabánzo.

122 Bolobaka: “Sikawa, tika nábanza elongo ná yo. Sikawa, yango ezali na ntina?”

123 Soki Nzambe alobaki ete ezalaki na ntina, ezali na ntina, ata soko tosengeli kolela, komilelalela, mpe kosala nyonso *oyo*. Soki Nzambe alobaki ete libatizi ya Molimo Mosanto ezali na ntina, ata Ezali na bozito ndenge nini, mpe ata osengeli kotika makambo boni ya mokili, okosengela kosalela Yango, moko na mikolo oyo, mpo na kotikala na bomoi. Yango nde nzela bobele moko mpo na kobika.

124 “Sikawa, tosengeli nde kosalela lobiko na nzoto uta na Nzambe, na ntango oyo tozali na minganga ya malamukoleka na mokili?”

125 Nzambe apesaki yo lobiko na nzoto uta na Nzambe mpo Ayebi ete osengeli kosalela yango. Apesaki yo makabo ya Molimo.

126 Mpe bobele ntango Satana akomaki zingazinga na Éva, abandaki kobanzabanza ná ye. Sikawa: “Solo mpenza, solo mpenza, Nzambe akosala *yango* te.”

127 Lelo bato balobaka: “Eloko lokola lifelo ezalaka na yango te.” Bato mingi balobaka bongo. Bomoni? “Oh, solo mpenza, Nzambe akozikisa bana na Ye te.”

128 Na ntembe te, Azíkísaka bana na Ye te. Kasi zábolo akozikisa baoyo ya ye. Yo ozali mwana ya nani? Yango nde likambo oyo elandi. Lifelo ekelamaki mpo na zábolo ná bana na ye, mpo na bana ya Nzambe te. Ata moko te kati na bango akokende kuna. Ya solo. Etalelaka soki ozali mwana ya nani.

129 Sikawa, Nzambe apesaki Eva ná Adama Liloba na Ye, mpe Atikálá kobóngola Yango te. Azalaka ntango nyonso na... Moklisto, to mondimi, Ebundeli na ye ezali Liloba.

130 Likoló ná nse ekoleka. Bindimeli nyonso ekoleka. Ba-denomination nyonso ekokweya. Ekólo nyonso ekozinda. Kasi Liloba na Nzambe ekoumela Seko. Ntango moko ekoya oyo monzoto ya ntongo ekongenga lisusu te. Ntango moko ekoya oyo moi ekongenga lisusu te, sánzá ekongenga lisusu te, mpe mokili ekobaluka lisusu na nzela na yango te.

131 Kasi Liloba na Nzambe ekotikala ndenge moko mpo na libela. Iyo. Ezali eloko moko oyo ekoki koningana te, eloko moko oyo bokoki kotalela. Ezali na sikisiki. Soki Nzambe alobi likambo, ekokokisama sikisiki.

132 Soki Alobaki, na elanga ya Edene, mpo na Mosikoli, ete Akotinda Masiya, esengelaki kokoma na sikisiki. Ata bazelaki

mibu nkoto minei, kasi Ayáki. Asengelaki koya mpo ezalaki Liloba na Nzambe lilakami.

¹³³ Nzambe alakaki kotinda Ye lisusu. Akozala awa. Ata bazángi kondima ná bato na ntembe boni bayei, ata basali soko nini, boni boni communisme epanzani, Yesu Klisto akoya, mpe akozua Lingomba oyo esukolami na Makila, mpe Akomema Yango na mobembo kino na Lola. Mpo na nini? Esengeli solo kokokisama. Liloba na Nzambe nde elobaki yango.

¹³⁴ “Soki okoki kondima, nyonso ekosalema.” Wana ezali solo bongo. Nzambe nde alobaki yango, mpe ekoki koningana te, ekoki kokweya te. Nzambe alobaki yango, soki okangámi ná yango (Sikawa . . .) mpe ondimeli yango, ndima yango.

¹³⁵ Ezangi te koloba polele. Nzambe akoki te kozánga koloba polele. Bindimeli ekoki koloba polele te. Ba-denominations ekoki koteya makambo polele te. Kasi Nzambe akoki te kozanga koloba polele. Mpe Liloba oyo ezali Nzambe. Mpe eloko moko te kati na Yango ezangi koloba polele. Ezali na lolenge nyonso sikisiki.

¹³⁶ Sikawa, Lingomba monene elátisami bibundeli na nzela na Liloba. Sikawa, ntango Yesu ayaki, Asalelaki nde ebundeli yango moko? Na ntembe te, Asalelaki yango.

¹³⁷ Ntango Satana ayáki epai na Ye, ná makasi na ye nyonso, mpe alobaki: “Soki ozali Mwana na Nzambe, sálá likambo *boye ná boye*.”

¹³⁸ Alobaki: “Ekomami . . .” Azóngaki mbala moko na Liloba. Satana amekaki Ye na mwa likoló koleka. Kasi, Yesu azongaki mbala moko na Liloba: “Ekomami . . .”

¹³⁹ Atelemaki kaka wana, na Liloba yango, mpo na kotalisa biso ndakisa. Ndenge Alobaki na Bakolinti ya Liboso, liboso . . . Santu Yoane 14:13: “Nasili kopesa bino ndakisa.” Mpe ezali ndakisa, ete tosengeli mpenza, tosengeli malamú mpenza kotia motema na Liloba na Nzambe. Tika ete makambo mosusu nyonso ézala lokuta. [Maloba mazangi na bande—Mok.]

¹⁴⁰ Yango nde eloko moko oyo ezali sikisiki. Nzambe apesaki elaka. Nzambe akokokisa elaka yango. Balobaka: “Ndenge nini likambo *oyo* ekoki kosalema? Ndenge nini Akoki kosangisa etonga ya bato, ná ngolu ya Konétolama, mpo bámata?” Nayebi te ndenge nini Akosala yango. Ezali likambo na ngai te, kotuna ndenge nini akosala yango. Komilengela kaka mpo na yango nde ezali likambo na ngai. Alakaki yango. Ekosalema. Abátelaki Lingomba na Ye na nzela na Liloba.

¹⁴¹ Mpe eloko ya liboso ezalaki mabánzo. Sikawa balobaka: “Ezali sikawa likanisi ya malamú, soki nakómi kosambela na lingomba *oyo*, ezali kaka malamú lokola lingomba *wana*, boye te?”

142 Lingomba ezali bobele moko oyo okoki kozala moko na yango. Okomibakisáká na Yango te. Okoki ntango mosusu kokóta na moziki, moziki ya ba-Metodiste, moziki ya ba-Presbyterien, moziki ya ba-Batiste, ná moziki ya ba-Pantekotiste. Kasi babótamaka kati na Lingomba ya Yesu Klisto, boye, oyo wana nde Lingomba.

143 Baoyo wana ezali ba-moziki, epai wapi bato basanganaka, ndenge biyánganga ekitaka na etape *oyo*, mpe bíbengá na etape *oyo*, mpe—mpe bongo na bongo. Oyo wana nde boyokani na bondeko oyo bozalaka na yango, ntango bokabolaka bilei ya ndenge moko.

144 Kasi na oyo etali Lingomba ya Yesu Klisto, nzela ezali bobele moko. Ezali Mbotama. Mbotama!

145 Ezali kaka lokola moto, ndenge nalobaka mbala mingi, lokola eyánganga oyo akiti na etape, azali komeka kobamba nsálá ya paon na mapapu na ye, mpe koloba: “Bomoni, nazali paon, nazali kotalisa kitoko na ngai.” Bomoni? Abambi nsálá yango kobamba, ye moko. Soki azalaki paon ya solosolo, lolenge na ye elingaki kobota nsálá ya ndenge wana.

146 Soki Lingomba na Nzambe na bomoi ezali Lingomba ya Nzambe na bomoi, Ekobota Liloba na Nzambe na bomoi. Bozali na ntina ya kobakisa nsálá ya paon esika moko te. Mpe nsálá moko na moko oyo ezali wana ekozala ya paon. Bokoki kondima yango. Mpe nsala moko na moko oyo ezali kati na Lingomba ya Nzambe ekozala Liloba na Nzambe. Akokótisáká eloko mosusu te, kaka Liloba. Amen. Mpamba te, lolenge ya Molimo ebimisaka kaka Liloba. Amen. Nabandi komiyoka mosambeli. Ya solo.

147 Eloko moko te omekaka kosala, eloko moko te omisalelaka. Okoki te komisalela reli- . . . Okoki komisalela lobiko ya molimo te. Okoki komisalela makabo te. Osengeli kobota makabo. Ya solo mpenza. Bomoni? Mpa—mpate amisalelaka nkunza te. Azalaka na nkunza mpo azali mpate. Abotaka nkunza kobota. Nzete ya—ya—ya cerise emisálelaka cerise te. Ebotaka cerise kobota, mpo bomoi na yango nde ezalaka bongo.

148 Lingomba ya Nzambe na bomoi ekotisaka Yango te, mpo na koluka komikómisa lokola eloko moko. Basílá kozala oyo bango bazali, na ngolu na Nzambe. Mpe Liloba na Nzambe esili kosangana ná bango, mpe bango basili kosangana ná Liloba. Mpe misala oyo ebotamaki na Ye oyo abongaki be, Yesu Klisto, Nzambe atalisami na nzoto, ekobotama yango moko na nzela na mondimi nyonso oyo abotami mbala mibale. Ye alobaki bongo. Amen. Eloko mosusu te. Sikawa, wana ezali eloko moko ya sikisiki.

149 Sikawa, elingaki kozala mwa—mwa mobulu na moto moko, soki atikálá koyébá te loláká ya solosolo ya kelelo. Sikawa, moto oyo atikálá koyékola koyeba kelelo te, mpe ayóká yango te, ee, akoki ntango mosusu kozala na mobulu ntango ayoki

loláka moko oyo ekeseni ná oyo asílá koyoka. Ayokaka ntango nyonso: “Kóta na lingomba. Yáka na mokanda na yo *awa* mpe *awa*.” Ekoki kozala na yango ntango mosusu mabe te. Yango nde nyonso oyo ayebi.

¹⁵⁰ Kasi na bongo, ntango bokomi kozónza, na likambo ya libatizi ya Molimo Mosanto, kolobela likambo ya nguya na Nzambe ná makambo oyo Asálaka; ná lolenge oyo esálaka ete basi ná mibali, bango mibale, bámipetola na bomoi ya masumu; ndenge esálaka ete bátámbola na bosantu mpe na bosembo. Mpe makambo oyo esálaka, mpe epésaka libatizi, kolobáká minoko na sika, kobíkisáká babeli, kobenganáká milimo mabe, kosakoláká, makabo, oh, bimononeli, makambo nyonso kati na Lingomba. Aleluya! Ya solo. Ntango eyúlaka, na bongo epesaka mwa mobulu na baoyo batikálá koyóka naino te kelelo ya ndenge wana.

¹⁵¹ “Ee,” okoloba, “lingomba na biso etéyaka yango te.” Na bongo, ezali koyula kelelo ya Nsango-malamu te. Nkembo! Ya solo.

¹⁵² Kasi mpo na basodá oyo bayékólisámá, aleluya, ntango bayokaka kelelo yango koyula, bayébaka ndenge ya kotelema na molongo. Tokende liboso, sodá Moklisto! Nkembo! Oh, ezali sikisiki!

“Oyebi ndenge nini ete ezali sikisiki?”

Ezali na Liloba.

“Ee,” okoloba, “lingomba na biso etéyaka Yango te.”

¹⁵³ Kasi kelelo eyúli Yango. Naboyi koyékolisama na endimeli ya lingomba, mpo ekoningana mpe ekokweya. Kasi soki oyekolisami na Liloba, likoló ná nse ekoleka, kasi Liloba oyo ekotikáláká koleka te. Bindimeli nyonso, makambo nyonso mosusu, ekokweya. Kasi Liloba oyo ekokweyáká ata moke te. Amen. Yango nde loláká. Yango nde loláká oyo nalingi koyoka. Iyo, misie.

“Oh,” okoloba, “nakoyeba ndenge nini?”

¹⁵⁴ Yesu alobaki: “Bampate na Ngai bayokaka loláká na Ngai. Bayebi kelelo na Ngai.” Alobaki, na Santu Yoane, mokapo ya 14 mpe molongo ya 12, “Ye oyo akondimela Ngai, misala mizali Ngai kosala, ye mpe akosala yango.” Sikawa, Alobaki bongo.

Soki moto alobi: “Ee?”

¹⁵⁵ Baebele 13:8 elobi: “Yesu Klisto azali ndenge moko lobi, lelo, mpe libela.”

“Oh,” bango balobaka, “na lolenge moko boye.”

¹⁵⁶ Sikawa, mpate ya solosolo akoloba: “Ah-oh. Oh, eloko moko eyokanaki malamau te, na kati na yango. Eyókanaki malamau te. Oh, esengelaki kozala mondule mosusu. Ezalaki kelelo te, mpamba te Biblia elobaka polele.”

¹⁵⁷ Elobi: “Bokozua Molimo Mosanto.” Elobi te: “Bokoki.” “Bokozua, moto na moto.” Ntango boni? “Mpo na bana na bino, bana ya bana na bino, ná baoyo bazali mosika, ná baoyo nyonso Nkolo Nzambe na biso akobenga.” Akoyula kelelo mpo na loposo nyonso ná bikeke nyonso, mpe bakoyoka Mongongo na Ye. Bakondima Yango, baoyo babongísámá mpo na Bomoi. Amen. Bakondima Yango mpo bayebi ete Ezali kelelo ya Nsangomalamu nde ezali koyula. Ezangaka koloba polele te. Sodá nyonso ayebi lolenge ya kotelema.

¹⁵⁸ Sikawa, bomonaki Petelo, Yoane, ná Yakobo, ná lingomba ya ebandeli, kokende liboso denge wana, mpo kelelo, Yesu, alobaki: “Bókende na mokili mobimba, bóteya Nsangomalamu.” Malako 16, bomoni: “Bilembo oyo ekolanda baoyo bakondima.” Tomoni Petelo, Yakobo, Yoane, bango nyonso kosala molongo, kotámbola kokokana na Yango.

¹⁵⁹ Kasi biso tokómi kobaluka na ngámbo mosusu, kokende mosika na Yango? Moko akei liboso, mosusu azóngi nsima? Moko alobi: “Ee, oyo wana ezalaki mpo na eleko mosusu. Oyo wana, loláká wana—wana ezalaki mpo na ntango mosusu.” Oh, te. Ekoki kozala bongo te.

¹⁶⁰ Mampinga mobimba ya Baklisto bayókaka kelelo. Nzambe alobaki ete ezalaki kelelo. Akoki kobongola yango te. Yango nde loláká oyo Alobaki ete ekoyula. “Na yango nde bato nyonso bakoyeba,” mpe na mbala moko, Lingomba ekei.

¹⁶¹ Bamosusu kati na bango bandimaka Boyei na Ye mpenza te. Biblia elobaki ete Akoya, boye tozali kozela Boyei na Ye. Soki Ayei na mpokwa oyo te, tokozela Ye lobi na ntongo. Soki Ayei lobi na ntongo te, tokozela Ye lobi na mpokwa. Mpe tokokoba kozela. Soki tolali mpongi, biso—bisó . . . tokokweya sénza mpamba te. “Mpamba te kelelo ya Nzambe ekoyula, kelelo oyo ya nsuka, mpe bakufi kati na Klisto bakosekwa. Mpe biso baoyo totikali na bomoi tokonétolama elongo ná bango, mpo na kokutana ná Nkolo na mipepe, mpe kozala kuna libela.” Yango nde koyúla ya kelelo. Názala na bomoi to násila kokende, ezali kaka ndenge moko. Nakoyoka koyúla yango. Nakosekwa. Nkembo na Nzambe! Nakosekwa. Oh, iyo. Iyo.

¹⁶² Yesu alobaki, ete: “Bampate na Ngai bayokaka mongongo na Ngai.” Azalaki Liloba litalisami. Ntango . . . Ndenge wana nde ba-mpate na Ye bayebaka Ye.

¹⁶³ Sikawa bótala Bafalisai ná bamosusu na eleko wana. “Oh,” balobaki, “Mobali oyo azali Bezezebula.” Ntango Ayebisaki mwasi wana na libulu ya mai, na ntina na masumu na ye, mibali oyo azalaki na bango, ntango Ayebisaki Natanaele esika oyo azalaki, na nsé ya nzete, esika oyo Filipino abengaki ye, kuna na nsé ya nzete ya mosuke, kobóndeláká, ee, balakisi ya eleko wana balobaki: “Moto oyo azali Bezezebula. Azali molimo mabe. Azali moto na solóka.”

164 Kasi ezalaki bongo te mpo na Petelo, Yakobo, ná Yoane, ná bamosusu. Bango bayebaki yango. Mpo na nini? Bayebaki ete Nzambe alobáká, na mongongo ya Mose oyo epemelami, ete ntango Masiya akoya, Akozala mosakoli. Mpe ntango bamonaki makambo oyo Alobáká kotalisama mpe kokokisama be, bayebaki ete ezalaki bilei ya bampate. Bayebaki ete wana ezalaki kelelo. Mpe babandáki kolanda yango. “Ba-mpate na Ngai bayebi yango,” mpo bamonaki Liloba na Nzambe kotalisama.

165 Sikawa, lelo, bato bandimaka te ete eloko lokola libatisi ya Molimo Mosanto ezalaka. Bayáka awa to na bisika mosusu oyo bazali na Molimo Mosanto, mpe bamonaka elaka ya Nzambe kokokisama mpenza, ee: “Bampate na Ngai bayókaka mongongo na Ngai.” Bayébaka koyúla ya kelelo yango mpo ezali Biblia. “Yesu Klisto ndenge moko lobi, lelo, mpe libela.” Azali Baebele 13:8 kino lelo, ya solo.

166 Ezali na ntina te, sikawa, ezali kaka ndenge moko, ata mindule ya lingomba boni ezali kobeta. Babéti mindulu bazali mingi na mangomba, boyebi, bazali kobeta mindule bipai na bipai, koloba: “Oh, ntango na bikamwa esíla koleka. Lobiko na nzoto uta na Nzambe ezalaka te.”

167 Oh, bampate ya solosolo bayókaka oyo wana te. Kasi bayokaka nde kelelo wana, oyo ya solo mpenza.

168 Mindule oyo ya mangomba ekoki kobeta ata loláka nini. Bokoki. . . Bótala oyo bazali na yango lelo, mindule ya mangomba. Moko akei ngambo *oyo*, mpe mosusu akei oyo *wana*. Mpe zábolo afandi kuna na nsuka, alobi: “Bótala, bakómi kobunda bango na bango. Esili. Nazali ata na ntina ya koningisa loboko te.”

169 Kasi, ndeko, tika ete bango nyonso básimba mandóki mokolo moko, bázonga na malako bango nyonso. Oh, la la! Na bongo bokomona “tokei liboso basodá Baklisto,” ya solo, bakoyoka mindule te, kasi bakoyoka kelelo.

170 Tótelema naino, mwa moke, mpe tózonga nsima mpo tótala bamosusu kati na bango sikawa. Tokosilisa kala mingi te, mpo nalingi koumisa bino awa ntango molai te. Kasi tozonga nsima mpo tótala bamosusu oyo bayókaki loláka oyo. Tózua. . . Mpe bandimisamaki mpenza. Sikawa, nasili kolakisa bino ete makambo nyonso mosusu ezali sikisiki te. Tózua kaka moto moko ya kala, mwa moke.

171 Tózua mosakoli Yobo. Sikawa, moto yango alekaki na momekano, kasi ayebaki ete Nzambe asengelaki na mbeka ya kotumba. Yango nde Nzambe asengelaki na yango, mpe yango nde nyonso oyo Asengeli na yango. Mpe ata malózí boni ebétaki ndako na ye. . . ezalaka te ete Nzambe, ntango nyonso. . .

172 Ntango omoni ete likambo moko ezali kotambola malamau te na moto moko, elingi koloba te ete Nzambe azali kobéta

ye fimbo. Ntango mosusu ekoki kozala te ete azali libanda na mokano ya Nzambe. Ayebi na motema na ye soki ayokaka kelelo to te.

¹⁷³ Nzambe asengelaki na mbeka ya kotumba, mpe Yobo atelemaki ngwi likoló na yango. Esili. Balobaki: “Yobo, ozali mosumuki na nkúkú. Ozali kosala likambo moko ya mabe.” Kasi ayebaki ete ezalaki bongo te. Atelemaki ngwi wana, mpo asilaki koyoka koula ya kelelo, mpe atelemaki ngwi ná yango.

¹⁷⁴ Mpe, sukasuka, na nsuka na likambo mpenza, ntango akómaki. . . Zábolo asíláki kotombokela ye, azuaki libota na ye, mpe azuaki bana na ye, azuaki ba-kaméla na ye, mpe azuaki bozui na ye nyonso, mpe abebisaki bokolongono ya nzoto na ye moko. Ye afandaki likoló na libóndó ya putulú. Emonanaki lokola makambo nyonso ekomaki na nsuka. Kasi ata bongo alobaki: “Nayebi ete Mosikoli na ngai azali na bomoi. Na mikolo ya nsuka Akotelema na mokili. Ata nkusú ya loposo elei nzoto oyo, kasi na mosuni na ngai nakomona Nzambe.” Eloko moko te ezangaki kozala polele ná yango, boye te? Alobaki te: “Na—na—na—namoni lokola Azali na bomoi.” Alobaki: “Nayebi ete Azali na bomoi, mpe na ntango ya nsuka, Akotelema na mokili. Ata nkusú ya loposo elei nzoto oyo, kasi na mosuni na ngai nakomona Nzambe.” Oh, la la! Esálemaki. Andimísámaki mpenza.

¹⁷⁵ Abraham, azalaki kotámbola na elanga mokolo moko, ayokaki Nzambe koloba: “Abraham, Nako. . .” Akútánaki ná Abraham liboso Liloba ékomama, mpe Alobaki: “Abraham, Nakopesa yo mwana mobali na nzela ya mwasi na yo, Sara.” Sara azalaki na mibu ntuku motoba na mitano na eleko yango, mpe Abraham azalaki na mibu ntuku nsambo na mitano. Mpe bamiléngélaki mpo na yango, mpe ye azalaki na nsóni te mpo na kotátola. Ayébaki ete akozua mwana yango.

¹⁷⁶ Mpe Biblia elobi: “Atengá—tengaki te na elaka ya Nzambe na kozanga kondima, kasi andimisamaki na mobimba mpenza.” Amen. Kondimisama na mobimba mpenza, elingi koloba ete akútanaki ná sukisa. Amen. Yango mpenza. Sukisa ezali nsuka ya nzela. Ezali eloko ya nsuka. Ezali—ezali nyonso na yango.

Alobaki: “Nandimisami na mobimba mpenza ete, oyo Nzambe alakaki, Nzambe azali na makoki ya kokokisa yango.”

¹⁷⁷ Yo, na mpokwa oyo, ondimisami na mobimba mpenza ete oyo ezali Molimo Mosanto? Ondimisami na mobimba mpenza ete oyo nde nzela? Ondimisami na mobimba mpenza ete Azali Mobikisi na bokono? Ondimisami na mobimba mpenza ete Akozonga? Ondimisami na mobimba mpenza ete Azali ndenge moko lobi, lelo, mpe libela? Amen. Kondimisama na mobimba mpenza! Iyo.

¹⁷⁸ Tózua ndakisa mosusu, Eliya, ntango azalaki kuna likoló na ngomba. Aútaki kowélana ná Yezabele, ná elongi na ye oyo bapakólá-pakólá, mpe akómaki kolemba makambo yango. Basi nyonso, tóloba, bakómaki kolanda lokolo ya mwasi ya mokonzi,

ntango mosusu na midele ya suki evimbisi moto mpe oyo nyonso bazalaki na yango na eleko wana. Aútaki kowélana mingi na likambo yango kino e—ekomaki mpenza kolembisa ye nzoto.

¹⁷⁹ Na mbala moko, Nzambe alobaki na ye: “Kita kuna. Oyebi ete mbúla ebétaka pene na mikolo mibale to misato na mpóso moko, awa boye. Kasi telema liboso na Akába, mpe yebisa ye: ‘YANGO ELOBI NKOLO. Mamwe ekokwéya te uta na likoló soki ngai nabengisi yango te.’” Oh, la la!

¹⁸⁰ Alobaki te: “Sikawa, Akába, ntango mosusu, ntango mosusu ekoki kosalama boye.” Oh, te. Andimisamaki na mobimba mpenza, ezalaki mpenza polele. “Mamwe ekokweya te, mvúla ekobéta te, soki ngai nabengisi yango te.” Amen. Nkembo! Oh, mpo na nini? Ayókaki kelelo. Elobaki polele. Ayebaki Nzambe na ye. Ayebaki ete eloko moko ekosálema, ntango Nzambe alobaki Liloba yango, likoló mobimba ná nsé elingaki koleka kasi yango e—elingaki kosálema, esengelaki kosálema. Andimisamaki na mobimba mpenza.

¹⁸¹ Sikawa, Alobaki: “Eliya, Nalingi ete ómata kuna, na esika oyo ekauki koleka na ekólo mobimba, likoló na ngomba mpenza, esika ata liziba moko ezali te. Kasi Nabongiseli yo liziba moko kuna.”

¹⁸² Andimisamaki na mobimba mpenza. Amataki likoló na ngomba mpe afandaki pembeni na mokele ya Kerite. “Sikawa, nazali kosala nini awa na likoló?”

“Nasili kopesa mitindo na biyánganga báleisa yo.”

¹⁸³ “Sikawa, ndenge nini biyánganga yango. . . Sikawa, zela naino, Nkolo?” Te, te. Kelelo eyúlaki. Ekoki mpenza. “Ekosalema ndenge nini? Nayebi te. Etali ngai te. Bomoni? Ngai nakomitungisa mpo na yango te. Ezali likambo ya Nzambe. Alobaki ete Apesaki mitindo na biyánganga.”

¹⁸⁴ “Ee, Nkolo, Okolinga kolimbolela ngai yango, mpe koyebisa ngai mpenza esika nini. . . biyánganga yango ekótaki kelasi nini, mpo na koyékola koloba Kiébele? Lolenge nini ya. . . Balámbaka nde na ba-cuisinière ya gaz, to balámbaka nde na móto ya nkoni, to basalaka ndenge nini? Mpe na esika nini bako. . . Bakoboma nyama ya ndenge nini? Bazali kaka bandeke ya mike. Ndenge nini bakobomela ngai ngombe, mpo bámemela ngai sandwich ya ngombe?” Bomoni? Bomoni? Yango nde etunamaki te.

¹⁸⁵ Nzambe, ke—kelelo ya Nzambe, Mongongo na Ye esilaki koula mpe koloba: “Nasili!” (Ezali te: “Eliya, Nakoki kosala yango.”) “Nasili kosala yango.” (“Nakosala yango.”) “Nasilá kosalá yango.” Amen.

¹⁸⁶ Oyo wana nde Nzambe na biso, na mpokwa oyo. Ezali te: “Akosala yango.” Asilá kosala yango. Amen. Asilá kosala yango. Amen. Ezali te: “Akosala; Akoki kosala; ntango mosusu

Akosala.” Asílá kosala yango. “Nasili kopesa mitindo na biyánganga.”

¹⁸⁷ Apésá Molimo na Ye na bato nyonso. Apésá mapamboli na Ye. Amataki na Likoló, mpe Apesaki makabo na bato. Moto moko akozua yango. Moto mosusu akoboya yango. Ndenge ekosalema, etali ngai te. Ezali kaka ete ésalema. Nzambe alobaki ete ekosalema bongo, mpe esalemi bongo. Petelo alobaki, na mokolo ya Pentecote: “Bóbongola mitema, moko na moko na bino, mpe bózua libatishi na Nkombo na Yesu Klisto mpo na bolimbisi ya masumu na bino, mpe bokozua likabo, Molimo Mosantó.” Ekoya ndenge nini? Nayebi te. “E—elaka yango ezali mpo na bana na bino, mpo na baoyo bazali mosika, baoyo nyonso Nkolo Nzambe na biso akobenga.” Sikawa, bokoki kondimbola yango ndenge mosusu te. Kelelo esili koyúla, mpe ngai nandimi yango. Natosaki yango, mpe nazuaki yango. Amen. Sikawa bómeka kaka kolongola ngai yango na makanisi. Amen. Oh, ngai nabongi be te. Te.

¹⁸⁸ Ndakisa, na mpokwa wana, ndeko mwasi mobange ya moindo wana, alobaki: “Mpaka, nakoki kopesa litatoli?”

“Iyo, madame.”

¹⁸⁹ Alobaki: “Nalingi koloba likambo moko.” Alobaki: “Na—na—nazali te oyo ngai nalingi kozala.” Mpe alobaki: “Nazali te oyo nasengelaki kozala. Kasi, nayebi likambo moko, nazali lisusu oyo ngai nazaláká te.”

¹⁹⁰ Boye, tomiyokaka mpenza lolenge wana mpo na yango. Nazali te oyo nazaláká, mpo nasíli kobikisama, na mpokwa oyo, na ngolu na Nzambe, mpe nasili kozua libatishi ya Molimo Mosanto, kokokana na etinda. Esopanaki kuna Mokolo ya Pantekote, elaka epesamaki, mpe ngai nandimaki yango. Ezalaki mpenza polele. Nayokaki koyúla yango. Natósaki yango, mpe nandimisami mpenza ete ezali yango. Na ntembe te. Nayebi ete ezali yango. Ya solo mpenza.

¹⁹¹ Simeona, mobange moto na bwanya ya mibu pene na ntuku mwambe, mibu nkama na nkama eutaki koleka oyo ata mosakoli moko te azalaki na mokili, kasi azalaki kotambola ná lokumu monene. Molimo Mosanto asolólaki na ye mokolo moko, ete: “Simeona, oyebi, yo okokufa te kino okomóna lobiko ya Nkolo.” Nkembo!

¹⁹² Ntango mosusu nganganzambe mokonzi, asimbacki-simbacki mandefu na ye mwa moke, mpe alobaki: “Simeona, osengelaki kosanola mandefu na yo na ngámbo mosusu.”

Alobaki: “Wana ekosala na yango bokeseni ata moke te.”

“Oyebi ndenge nini ete ozali na elonga?”

“Molimo Mosanto ayebisaki ngai bongo. Nakokufa te.”

¹⁹³ “Ee, Simeona, ee, ozali. . . Ee, okómi pene na liwa sikawa.”

194 “Oh, oyo ozóloba etali ngai te. Kasi Nzambe ayebisaki ngai ete nakomona kufa te kino námona lobiko na Ye. Ezalaki mpenza polele. Nakokufa te. Nakoki komona liwa te kino námona Ye.” Amen. Yango mpenza.

“Okosala yango ndenge nini, Simeona?”

“Ngai, ezali likambo na ngai te.”

“Azali wapi, Simeona?”

“Nayebi te.”

“Oyebi ndenge nini ete okomona Ye?”

195 “Nzambe nde alobaki bongo. Yango mpenza. Ezali Liloba. Nakomona kufa te kino nakomona Ye.” Oh, la la!

196 “Oh, mobange mobali oyo. Na ntembe te, motó na ye ezali lisusu kosála malamau te, boyebi. Boye, bótika ye kimia.”

197 Kasi amonaki Ye, ata bongo. Iyo, misie. Nzambe abongisaka nzela mpo na bato oyo bakamataka Liloba na Ye.

198 Yesu, ntango Azalaki awa na mokili, Atélemaki wana na nkunda ya Lazálo.

199 To, liboso na yango, ntango Azalaki kowélana ná—ná bato, baoyo bazalaki koloba lolenge nini Ye, ata akokisaki naino mibu ntuku mitano te, azalaki koloba ete Amonaki Abraham. Bomoni ndenge Andimisamaki mpenza? Alobaki: “Liboso Abraham ázala, NAZALI. NAZALI.” Ezali te: “Nazalaki,” to, “Nakozala,” kasi, “NAZALI. Nandimisami mpenza.”

200 Na bongo, Alobaki, na nkunda ya Lazalo, liboso Ákende kuna, Alobaki, ayebisaki Malata, Alobaki: “Nazali lisekwa mpe Bomoi.” Alobaki te: “Nasengelaki kozala,” to: “Nakozala,” kasi: “Nazali.” Amen.

201 “Soki Ozalaki awa, ndeko na ngai alingaki kokufa te. Kasi ata sikawa, Nkolo, nyonso oyo Okosénga na Nzambe, Nzambe akopesa Yo yango.”

Alobaki: “Ndeko na yo akosekwa.”

202 “Oh, akosekwa na mokolo ya nsuka, na lisekwa monene. Azalaki mwana malamau. Iyo, nandimi ete akosekwa.”

203 Kasi Yesu amisembolaki mwa moke, Alobaki: “Kasi Nazali lisekwa mpe Bomoi.” Ezali te: “Nakozala; to nasengelaki kozala,” to bongo na bongo. “NAZALI.” Eloko moko te ezali wana, eloko moko te ezali kotengatenga to koningananingana ná yango. Ezalaki mpenza polele. Endimisamaki mpenza.

204 “Nazali lisekwa mpe Bomoi. Ye oyo akondimela Ngai, ata akufi, akozala na bomoi. Moto nyonso oyo azali na bomoi mpe andimeli Ngai akokufa ata moke te.” Ezali te—te: “Bakokoka ntango mosusu te. Ntango mosusu bakokufa te.” “Bakokufa te. Ezali—ezali mpenza polele na yango. Bakokufa te.”

205 “Ye oyo akoyóka Maloba na Ngai mpe akondima Ye oyo atindi Ngai azali na Bomoi ya seko, mpe akoleka ata na Kosambisama te, kasi asili kolongwa na kufa mpe koíngela na Bomoi.”

206 “Basengelaki koleka na Kosambisama te”? Bakoleka na Kosambisama te. Amen. Azuaki Kosambisama na ngai. Nazali na likambo ya kosala kuna te. Amen. Yango mpenza. “Asili kolongwa na kufa mpe koíngela na Bomoi.” Oh!

207 Sikawa alobaki ete andimaki yango. Sikawa, Yesu alobaki ata moke te: “Ee, oyebi, lokola ondimi yango, mpe oyebi ete Nazali Liloba, mpe—mpe Na—Na... Oyebi ete Nazali Ye oyo asengelaki koya. Osili kotatola yango. Ondimi yango. Nakoyebisa yo eloko nini tokoki kosala. Tókende kosangisa bampaka, mpe tókende kotala soki tokoki kosala likambo moko na ntina na yango.” Te, te. Alobaki: “Nako...” Ezalaki te: “Kende *kotala* soki Nakoki kosekwisa ye.” “Nakokende kolamusa ye.” Amen. Ezali te: “Nako—Nakomeka.” “Nakolamusa ya.” Ezalaki mpenza polele. Loláka yango elobaki mpenza polele, ntango Alobaki: “Nakolamusa ye. Nakolamusa ye.”

208 Mpe Ye moko oyo alobaki: “Nakolamusa ye,” apesaki yo elaka. Aleluya! Oh, la la! Amen.

“Nakokende kolamusa ye.”

209 Lisusu, Alobaki: “Bóbuka témpelo oyo, mpe Nakotala oyo Nakoki kosala mpo na yango”? “Bóbuka tempelo oyo, mpe Nakotelemisa yango lisusu na mikolo misato.” Ezalaki mpenza polele. “Sikawa Nakomeka. Bino nyonso bokoki kotelema zingazinga mpo bómona soki Nakoki kosala yango to te”? Ah, te. “Nakotelemisa yango.” Ezalaki mpenza polele. “Nakotelemisa yango. Bó—bóbuka yango; Nakotelemisa yango.” Oh, la la!

210 Mpo na nini? Ayebaki ete Azalaki Moto yango, oyo Dawidi alobelaki na Makomi. “Nakotika molimo na Ye na ewélo te, Nakotika mpe te ete Mobulami na Ngai ápolá.” Mpe Ayebaki ete Azalaki na kati ya elaka wana ya Makomi, yango wana Andimisamaki mpenza.

211 Sikawa, biso tokoki kondimisama mpenza bongo te? Tozuaka Ye lokola ndakisa na makambo mosusu. Na ntango nyonso oyo Liloba na Nzambe elobaki yango, tokoki kondimisama mpenza na Liloba, lokola Ye, mpo na yango?

212 “Nazali lisekwa mpe Bomoi.” “Nakotelemisa yango lisusu.” Amen. Mpo na nini? Ayebaki ete Liloba elobelaki yango, mpe Andimisamaki mpenza ete Akobima.

213 Soki nazali moto oyo balobeli kuna na Yoane 5:24: “Ye oyo akoyoka Liloba na Ngai mpe akondimela Ye oyo atindaki Ngai, azali na Bomoi na seko, mpe Nakosekwisa ye lisusu na mokolo ya suka. Akoleka na Kosambisama te; asili kolongwa na kufa

mpe koíngela na Bomoi.” Oyo wana nde—oyo wana nde biso. Kasi tobangaka eloko nini? Likambo yango nini?

²¹⁴ Elembo oyo bolátaka esálaka mpenza bokeseni nini? Bomibengaka bino moko *oyo*, oyo *wana* to oyo *mosusu*. Tozali bana na Nzambe, na ngolu na Nzambe. Totóndisámá na Molimo Mosanto, na ngolu na Nzambe. Ekosala bokeseni nini soki *oyo* azali *boye* to *boye*, soki azali Presbiterien, Metodiste to Batiste? Soki atóndisámá na Molimo Mosanto, azali na Bomoi ya lisekwa na kati na ye. Amen. Iyo. Sikawa, na Mokolo ya Pantekote. . .

²¹⁵ Yesu ayebisaki bango, na Luka 24:49: “Tala, Natindi elaka.” Alobaki te: “Nakokaki kosala yango. Nakotala oyo Nakoki kosala mpo na yango.” “Nakotinda elaka ya Tata na Ngai likoló na bino. Kasi bókende kuna, na engumba ya Yelusaleme mpe bózela kino bokozua nguya.”

²¹⁶ Sikawa, bongo soki bazeláki, tóloba, oh, mikolo motoba, mpe balobáki: “Tozali kozela nini? Nandimi ete tosendeli koyamba yango na nzela ya kondima. Bomoni bongo te?”

²¹⁷ Bongo soki Yakobo álobaka, na—na mokolo ya libwa, álobaka: “Simona, yaka naino awa. Oyebi, mokolo wana namiyokaki mwa ndenge mosusu. Omoni? Mpe oyebi eloko oyo ngai nandimi? Na—na—nandimi ete Alingi te ete biso tózela awa boye. Nandimi ete tosili—tosili kozua yango. Omoni bongo te? Tókoba kosala mosala na biso. Tókoba ná lotómo na biso?” Oh, elingaki kosalema ata moke te.

²¹⁸ Mpo na nini? Bayebaki eloko nini mosakoli alobaki. Sikawa bóyoka. Mosakoli alobaki: “Lilako esengeli kozala likolo na lilako, molongo esengeli kozala likolo na molongo, likolo na molongo; awa mwa moke mpe kuna mwa moke.” “Bókangama makasi na makambo oyo ezali malamú.” “Mpo na bibebu ya bapaya ná minoko mosusu nde Nakoloba na libota oyo. Mpe oyo nde kopema, sabáta.” Bayebaki ete likambo moko esengelaki kosalema ntango Yango ekoya.

²¹⁹ “Nakosopa Molimo na Ngai na mokolo ya nsuka.” Yoele 2:28: “Ekosalema na mikolo ya nsuka, elobi Nzambe, Nakosopa Molimo na Ngai likoló na nzoto nyonso, mpe bana na bino ya mibali ná ya basi bakosakola. Likoló na basali na Ngai ya basi ná ya mibali, Nakosopa Molimo na Ngai, na mokolo wana. Nakotalisa bilembo kuna na likoló mpe—mpe na mokili, na nsé, móto, ná molinga, mpe londende.”

²²⁰ Bayebaki ete kobikela makambo esengelaki kolanda boyei yango, ya Molimo Mosantu. Babóyaki kondima loláka oyo ezángi koloba polele. Kasi ntango bamonaki eloko wana kosala, mpe bamonaki ndanga ya Biblia kolóngobana ná yango, bandimisamaki mpenza. Babimaki na ba-balabala. Bólimbisa ngai. Oh, la la! Bandimisamaki mpenza ete ezalaki Molimo Mosanto.

221 Boyebi boniboni bango bandimisamaki mpenza? Na lolenge ete, Petelo, mwa moyinga wana, apumbwaki likoló na mobímbi ya nzete bakátá to likoló na kési moko, to esika moko, mpe alobaki: “Bino bato na Yuda,” akómaki kovimbisa ntólo lokola soso mobali. Alobaki: “Bino bato na Yuda, bino bafándi na Yelusaleme! Nazalaki kobanga bino, kala mingi te; sikawa, nazobanga lisusu te. Tika ete bóyeba likambo oyo, mpe bóyoka maloba na ngai. Bato oyo balángwe masanga te, ndenge bozali kokanisa. Kasi oyo ezali Yango.” “*Tobanzi* ete oyo ezali Yango”? “*Tondimi* ete oyo ezali Yango”? Alobaki: “Oyo ezali Likambo oyo mosakoli Yoele alobelaki.” Aleluya! Ezalaki mpenza polele ná yango. “Oyo ezali Likambo oyo mosakoli Yoele alobelaki.” Oh, la la!

222 Yesu alobaki, na Malako 16, Atindaki Lingomba na Ye ete: “Bókende na mokili mobimba, bóteya Nsango-malamu.” “Ntango mosusu bilembo oyo esengelaki kolanda; ekolanda, mbala na mbala, ntango mosusu”? “Ekolanda baoyo bakondima. Bilembo oyo ekolanda baoyo bakondima. Na Nkombo na Ngai bakobengana milimo mabe. Bakoloba minoko na sika. Soki balokoti nyoka to bameli eloko oyo ebomaka, ekosala bango mabe te. Soki batieli babeli maboko, bakobika.” Ezali te: “Ntango mosusu.” “Bakobika. Bilembo oyo ekolanda baoyo bakondima.”

223 Na mokuse, nakoloba boye, ndeko mobali, ndeko mwasi, na miníti moke oyo ezali kolanda. Nandimaka yango. Nandimaka ete makambo mosusu nyonso, makambo nyonso oyo ekesani na Yango, ezali sóló te. Nandimaka ete nyonso oyo etelemelaka Yango ekokweya. Nandimaka ete ézala ba-communisme boni, to boni ya ba-izme oyo ná izme wana, mpe mimesano ya mangomba ná mimesano ya Roma, ná nyonso mosusu, mimesano ya Amerika ná nyonso mosusu ekokweya.

224 Kasi Liloba yango ekoumela Seko, mpo Ezali Liloba. Mpe liboso ézala Liloba, esengeli kozala likanisi. Mpe liloba ezali likanisi oyo elobami polele. Mpe Nzambe, na Seko-na-Seko, ezalaki na likanisi na Ye. Atalisaki polele makanisi na Ye. Ekómaki Liloba, mpe Liloba esengeli kotalisama polele.

225 Yango wana, ntango Alobaki na ntina na Masiya, Masiya yango asengelaki koya. Alobaki ete Lingomba moko ekozala na ntango ya nsuka, oyo ezángi litónó to nzoloko; Lingomba moko ekozala wana. Aleluya! Alobaki yango. Nazui Liloba na Ye. Nandimi yango.

226 Nandimi ete Alakaki Molimo Mosanto na mondimi nyonso oyo akondima. Nandimi ete Petelo, na Mokolo ya Pantekote, ntango ateyaki liteya ya motuya wana, mpe ayebisaki bango nyonso ete bábóngola mitema mpe bábátisama, ete bilembo oyo ekoya, ná oyo. “Moto nyonso oyo akobélela Nkombo na Nkolo

akobika.” Nandimi ete ezali Solo; natelemaki likoló na yango. Nasíli komona yango kotalisama.

227 Nayebi ete nazali kobunda. Mpe nayebi ete nazali komeka kotíá litámbe. Liboso nátia litámbe, nasengeli kokata bitápe nyonso oyo ekutani-kutani, ná nzube, mpe nyonso mosusu, mpo na kolongola yango na nzela. Kasi mbala nyonso okotia litámbe, ozali kokende liboso. Amen. Kamáta mbeli mpe kátá yango.

228 Mingi kati na bino bozali komikanisela Paul Rader, moninga ya motuya mpenza. Nazalaki naino elenge motei, mwana moke. Nazaláká kokende na Fort Wayne, mpo na koyóka ye, na Rediger Tabernacle. Engambe mobali mpenza! Azalaki kozónga nsima, kotómbola pantalon na ye, kotómbola loboko mpe konguluma lokola ngombólo, mpe nazalaki kokanisa ete akopumbwa likoló na eteyelo. Ntango a . . . Mpe azalaki kobanda liteya na ye, iyo, na Genese, mpe kokende kino na Emoniseli, ebandeli kino nsuka. Paul azalaki mpenza mobali.

229 Mokolo moko azalaki koloba, alobaki: “Nazaláká mokáti ba-nzete na Oregon,” epai autáká. Alobaki: “Mokolo moko, boyebi,” alobaki, “na—nazalaki na bilanga ya koteya, mosika, na esika moko boye.” Nabosani sikawa esika yango. Azalaki kosala mosala ya misionere.

230 Andimelaki Nzambe, azalaki kondima lobiko na nzoto uta na Nzambe. Mpe Paul alobaki, awa mpenza, esika lingomba ya mokili ezali lelo, alobaki: “Soki náteyaka nsango na ngai ya ngolu epai ya ba-Pantekotiste ya móto-móto, na esika ya kosala oyo nauti kosala awa elongo ná bino,” alobaki, “mpe ememelaki ngai mitungisi mingi, nakómaki na niongo ya ba-dollar nkóto na nkóto. namitungisi mingi na lolenge ete nabeli cancer, mpe etikali moke nákufa sikawa. Soki námemaka nsango na ngai ya ngolu epai ya ba-Pantekotiste ya móto-móto, Nzambe alingaki kopámbole ngai mingi mpenza mpo na yango.” Ya solo.

231 Alobaki ete azalaki kuna na—na zámhá, mpe azuaki malaria ya makasi to maladi moko ya ndenge wana. Ezalaki mpasi mingi mpenza. Mpe azalaki mosika mpenza na kati ya zámhá, azalaki mondimi monene ya lobiko na nzoto uta na Nzambe. Mpe alobaki ete maládi yango ezalaki kaka kokóma makasi. Abóndelaki, abóndelaki. Mpe ba-misionére mosusu balobaki ete balingaki kozua masuwa mpo bákende kozua monganga. Ee, elingaki kozua bango mikolo mingi mpo na kozua monganga. Mpe alobaki: “Na—na . . . Bósala bongo te. Bótika yango bongo.” Alobaki: “Soki Nzambe abikisi ngai te, na bongo nazozonga na ngai Ndako.”

232 Bongo, alobaki ete mwasi na ye afandaki na chambre elongo ná ye. Molili ekobaki koyinda se koyinda. Mpe alobaki ete abéngaki mwasi na ye, alobaki: “Cherie, símba loboko na ngai.” Alobaki: “Kóba bobele kobóndela mpo na ngai. Molili ebandi kokóma makasi sikawa.” Alobaki: “Na—nandimi ete bililingi

ezali kokita zinga-zinga na ngai.” Alobaki: “Simba . . . Simba bobele loboko na ngai mpe bøndela, wana nazali kobima.” Amiléngélaki, mpo na kokutana na Nzambe.

²³³ Amemamáki na molimo, tóloba. Mpe alobaki ete alotaki ete azóngaki lisusu awa na Oregon, lokola elenge, azalaki kokata bantzete. Mpe alobaki ete mokonzi ya moláko alobaki: “Paul, kende kuna na ngámbo moko boye ya ngomba, mpe kátá nzete moko boye, ya bonene boye.”

²³⁴ Alobaki ete apotáki mbángu kino likoló na ngomba ná makolo na ye ya bolenge, mpe akataki nzete yango, alongolaki bitape na yango, mpe atelemisaki epasola likoló na yango. Alobaki ete epasola na ye monene ya míno mibale ekotaki na nzete ya petepete wana na pete mpenza. Mpe alobaki ete asimbaki yango, amilobelaki: “Ee, nakomema yango kino na nsé ya ngomba.”

²³⁵ Moto moko malamú mpe makasi, alobaki: “Nayekolaki kotia mabólongo elongo, mpo na komema na mokongo na ngai, eteni ya monene koleka ya moto.” Misuni na ye ezalaki na mokongo ná mapeka na ye, nsima ya makolo na ye. Alobaki: “Nakokaki komema eteni ya nzete ya monene,” kotia yango na lipeka, mpe kokende. Kasi alobaki: “Oyo wana ezalaki kaka eteni ya momesano ya nzete, kasi,” alobaki, “Ngai . . .” [Ndeko Branham atuti micro—Mok.] (Bolimbisa ngai.) Alobaki: “Nakokaki ata koningisa eteni ya nzete yango te.” (Bolimbisa ngai.)

²³⁶ Alobaki: “Nakokaki ata koningisa eteni ya nzete yango te.” Alobaki: “Nasalaki makasi, mpe nasalaki makasi mpe namekaki kotómbola yango, kasi nazalaki kokoka te.” Alobaki: “Nasilisaki makasi na ngai nyonso.” Alobaki: “Nazalaki kokoka ata koningisa nzete yango te.” Mpe alobaki: “Sukasuka, nalembaki mingi, nafándaki pembeni na nzete yango mpe nabandaki kopangusa motoki. Nalembáki mingi mpenza.”

²³⁷ Mpe alobaki: “Nsimá na mwa ntango, nayokaki mongongo ya patron na ngai.” Kasi alobaki: “Ezalaki mongongo ya bopolo koleka oyo nasílá koyoka.” Mpe alobaki: “Ntango nabalukaki, mongongo yango elobaki na ngai: ‘Paul.’ Mpe nalobaki: ‘Iyo, patron, ezali nini?’ Alobaki: ‘Mpo na nini ozali koluka kobenda yango ndenge wana?’” Alobaki: “‘Ee, yo moto otindaki ngai námema yango na moláko, kasi nalembi mingi, ná yango. Na—nakokoka te, patron.’ Alobaki: ‘Paul, ozomona te mokele ya mai oyo ezali kotiola kuna?’ Alobaki: ‘Iyo.’ Alobaki: ‘Mokele yango ezokita kino na moláko mpenza. Mpo na nini te kobwaka yango na mai, kopumbwa likoló na yango mpe kokita ná yango kino na molako?’ Alobaki: ‘Natikálá kokanisa yango te.’”

²³⁸ Na bongo, atindikaki yango na kati ya mai, apumbwáki likoló na yango, alobaki: “Oh, la la!” Abandaki kobéta-beta mai, mpe kopumbwa, mpe kogánga, na makasi nyonso, wana azalaki koleka likoló na mwa ba-mbóngé, mpe kokita likoló na mai,

ná nyonso wana, wana azalaki likoló na eteni ya nzete yango, azalaki kokita, kobélela: “Nazotiola likoló na yango! Nazotiola likoló na yango!”

²³⁹ Alobaki, na mbala moko, makanisi na ye ezongaki, azalaki na katikati mpenza ya chambre yango, mpe mwasi na ye azalaki kogánga elongo ná ye. Azalaki kogánga: “Nazotiola likoló na yango! Nazotiola likoló na yango! Nazotiola likolo na yango!”
Bandeke!

Bikólo ezali kopanzana, Yisraele ezali
kolamuka,
Bilembo oyo Biblia esakolaki;
Mikolo ya Mabota ekómi ya kotánga, etondi na
nsómo;
“Bózonga, E bapalangani, epai na bino.”

²⁴⁰ Nsango oyo ya Liloba na Nzambe ezali Solo. Názala na bomoi to nákufa, nazotiola likoló na Yango. Nazali te... Nawélanaka ná Yango te. Nazoluka mindongo ná Yango te. Nazozua Yango kaka, mpe nazotióláká likoló na Yango. Matóngi éya na yango. Nakoleka likoló ya mbonge nyonso. Nakokóma na molako, moko na mikolo oyo, wana nazali kotiola likoló na Liloba na Nzambe. Amen. Nandimisami mpenza ete nakokóma kuna.

Tóbondela.

²⁴¹ Mpo na nini okobunda-bunda ná mokumba na yo ya masumu? Mpo na nini okotikala ndenge ozali, kozanga koyeba esika otelemi, kokíma longwa na lingomba moko kino na lingomba mosusu, mpe longwa na esika moko kino na esika mosusu? Mpo na nini te kosundola nyonso na ekulusu, na mpokwa oyo, mpe kotiola likoló na Liloba? Mpo na nini te kozua elaka ya Nzambe na mpokwa oyo mpe kobima libanda na mobulu, mpo na koíngela na likoló monene oyo efungwami boye? Kobunda-bunda ná Yango te. Komitungisa ná Yango te. Ndimba Yango kaka, yamba Yango. Ezali Bokonzi oyo ekoki koningana te. Tiólá likolo na Yango.

²⁴² Soki ozali na bokono na mpokwa oyo, kamata elaka ya Nzambe: “Nazali Nkolo oyo abikísaka bokono na yo nyonso.”

²⁴³ “Nakoyóka malamú ndenge nini, Ndeko Branham? Monganga alobi ete nazali na bokono ya motema, nazali na cancer, nazali na bokono *boye* ná *boye*,” ézala eloko nini, “Nayókaka te, nalobaka te. Nazali mokufi miso,” ata eloko nini. Ekosala mpenza nini? Yambá kaka elaka ya Nzambe mpe tiólá likoló na yango.

²⁴⁴ Tózua eteni monene ya nzete, tókotisa yango awa, mpe tókoma likoló na yango: “Basili kobondela libondeli ya kondima na mpokwa oyo; ngai nakotiólá likolo na yango. Biblia elobi: ‘Libondeli ya kondima ekobikisa mobéli, mpe

Nzambe akotélemisa ye. Soki asalaki lisumu, ekolímbisamela ye.' Nazotióla likoló na yango. Nandimi yango."

²⁴⁵ Soki osálaki mabe, soki ozali motomboki na mpokwa oyo, "Ye oyo abómbaka masumu na ye akofúlúka te. Kasi ye oyo ayámbolaka masumu na ye bakoyokela ye mawa." Mpo na nini te koyambola yango?

"Ee, eloko nini nasengeli kosala, Ndeko Branham?"

²⁴⁶ Yámbólá yango, na nsima tiola likoló na yango. Nzambe alobaki bongo. Ekomema yo mbala moko mosika na masumu na yo.

²⁴⁷ Moto yango azali awa na mpokwa oyo, oyo atielá naino Nzambe motema mobimba te, mpo na lobiko ya elimo na ye, mpe okolinga ete tókánisa yo na libondeli wana tozali kosilisa? Okolinga kotómbola bobele loboko, lobá: "Bóndela mpo na ngai, Ndeko Branham. Nalingi kobwáka mitungisi na ngai." Nzambe ápambola yo. Nzambe ápambola yo. "Nalingi kobwaka..." Nzambe ápambola yo, madame. "Nalingi kobwaka mitungisi na ngai." Nzambe ápambola yo, ndeko mobali. Nzambe ápambola yo kuna, misie. Nzambe ápambola yo, mama moke. Malamu. Ya solo. Nzambe ápambola yo. "Nalingi kobwaka mitungisi na ngai likoló na Ye mpe kotiola kaka ná elaka na Ye sikawa. Nandimi ete Alakaki ete: 'Ye oyo akoya epai na Ngai, Nakobwaka ye libanda ata moke te.'"

²⁴⁸ "Ezali te ndenge nazali komiyoka: 'Babondelaki mpo na ngai lobi na mpokwa, Ndeko Branham; nazali komiyoka malamumpenza te.'" Etalaka yango ata moke te. Nazali kotiola ná mayóki na ngai te. Nazali kotiola ná Liloba na Ye. Ezali elaka na Ye.

²⁴⁹ "Ndeko Branham, nasilá kokende na etumbelo, mbala minei to mitano, mpo na komeka koyamba Molimo Mosanto. Nazuá Yango naino te."

²⁵⁰ Oyo wana ezali na ntina moko te. Tikala kaka likoló na eteni ya nzete yango, ekomema yo mpenza sémba kino na moláko, na molako ya Bana ya Liboso, na moláko ya basantu. Okokóma kuna. Tikálá kaka likoló na eteni ya nzete na yo, gángá mpe tómbola mongongo mpo na kosanzola Nzambe na makasi na yo nyonso. Nde lolenge ya kosala yango.

²⁵¹ Wana togumbi mitó, olingi mpenza kotiola ná yango? Na bongo, mwa eloko oyo ezali kobeta na motema na yo na pete, okolinga koya awa mpe kotelema liboso na etumbelo miniti moke mpo tóbondela mpe tótiela yo maboko? Tokosepela ete bóya awa liboso.

²⁵² Tótala naino malamum mwa eloko oyo etiami zinga-zinga na motema na yo na mpokwa oyo, mpe ezali koloba: "Oyebi ete ozali na libunga. Sikawa tómbola loboko." Malamu.

253 Omataki na eteni ya nzete yango, eteni ya nzete ya elaka na Ye; nzete, ekulusu oyo ekatamaki. Tiá maboko zingazinga na ekulusu yango sikawa. Támbole kino awa mpe loba: “Sikawa nakotióla ná yango. Sika-sikawa, nakondima yango. Nakoyamba yango. Nandimi yango. Nakotika yango ata moke te. Nakokangama ná Liloba yango, kino ntango oyo wana ekotátolama. Na bongo, nsima na yango kotatolama, nakosembola loboko mpe nakomata likoló na oyo mosusu, mpe nakobanda kotiola ná yango.” Bomoni?

254 Mpe liloba moko nsima na mosusu, litámbe moko nsima na mosusu, okozua nyonso oyo Nzambe alakáki yo. “Mpamba te nyonso ekosalema,” na ye oyo akotiola ná yango. Tióla ná elaka na Ye, mpo, na ntembe te, ekomema yo kino na moláko. Ekomema yo kino na Bozali ya Nzambe.

255 Okolinga koya sikawa wana togumbi mitó na biso? Mpe toséngi na moto nyonso oyo alingi kotelema liboso na etumbelo ete áya, mpo na ntango moke mpo na libóndeli.

256 “Nazali kotiola ná yango, Nkolo. Nkolo, nandimi. Ntembe na ngai nyonso ekundami na liziba. Nkolo, naye. Nandimi yango. Nazali komata liboso na Liloba na mpokwa oyo, mpe nakondima yango na motema na ngai mobimba. Nakangi Yo na Liloba na Yo.”

257 Mwasi moko ya motuya ateleme awa na etumbelo, mpo na—mpo na kotátola epai na Nzambe ete azali na eyóngi. Bokolinga te koyá, bino baoyo bogúmbaki mitó, mpe botómbolaki maboko, mpe bolingaki ete tókanisa bino na libondeli? Bokolinga kopusana awa liboso? Nzambe ápambola bino. Bóya awa. Yango mpenza. Bóya mpe bótelema awa boye. Bóloba: “Nakotióla likoló na yango. E Nzambe, Yo nde opesaki elaka yango, eloko moko ebetaki na ekuke ya motema na ngai, mpe naye sikawa mpo na kotióla likolo na yango. Mpe nakotikala mpenza likoló na yango kino ekomema ngai sémba na moláko. Nazali koya na moláko ya basantu ya Oyo-Aleki-Likoló.” Nzambe ápambola yo. Ezali malamumu. Yaka sikawa mpenza, yo oyo olingi kotióla ná yango. Kaka ndenge ozali, “Kaka ndenge nazali, ná eloko moko te”.

258 Bómikanisela. Okoloba: “Ezali nzete?” Iyo. Nzete moko ekatamaki, mokolo moko, mpe etiámaki lisusu na Kalvari. Pumbwá kaka likoló na nzete yango na mpokwa oyo, ná bilaka ya Nzambe, Liloba oyo ezalaki likoló na nzete yango.

259 Nazali kotióla likoló na yango. Nakondima yango, na motema na ngai mobimba. Nalingi kopusana na ndenge nyonso awa mpe kopesa mbote ya loboko na bandeko na ngai.

260 Nzambe ápambola bino, mpo na ngámbo malamumu oyo bozui. Nalingi ete bótikala awa, mwa moke, wana tozali kobondela. Nzambe ápambola yo, ndeko na ngai ya mobali. Ndeko na ngai ya mwasi ya motuya, Nzambe ápambola yo. Nkolo Yesu. . . ? . . . Nzambe ápambola yo, ndeko na ngai ya mobali. Nzambe

ápambola yo, ndeko mwasi. “Kamba ngai.” Akokamba bino kino na ngámbo ya ebale.

²⁶¹ Bómikanisela, lokola mosali ya Klisto, nazali na mokumba ya koteya Liloba. Nazali na mokumba ya litatoli na ngai. Mpe nakolinga kotelema awa na mpokwa oyo . . .

²⁶² Mobali ya mibu ntuku mitano na mitano, to mibu ntuku mitano na misato, nakokokisa mibu ntuku mitano na minei na Sanza ya minei, natelema awa mpe nayebi ete, ata emononeli oyo ya nsuka, ekoki kozala mwa mikolo na ngai ya nsuka na mokili. Na—nakoki kotika bino nsima na mwa mikolo. Nayebi te oyo yango elingi koloba. Bóyoka kaka bande yango mpe bókata ntina bino moko. Ngai nayebi te oyo yango elingi koloba. Nakotelema awa, ngai oyo nandimaka ete ekoki kosalema ete mateya na ngai ya nsuka oyo nakoteya ata, ezali awa na Phoenix, bongo náloba likambo moko ya lokuta, wana nayebi ete nakosuka nde kuna, mpe nakosambisama na maloba na ngai?

²⁶³ Bandeko na ngai ya mibali, bótika ete náyebisa bino boye, ná bandeko na ngai ya basi. Bozalaki na mayangani. Boyebi oyo yango ezali, lisósoli ya makanisi ná nyonso wana. Nasílá nde koyebisa bino likambo moko, na Nkombo na Nkolo, kozanga ete ékokisama? Natuni na moto nyonso. Te, misie. Na mokili mobimba, mpe bimononeli nkóto na nkóto, oyo esalémá naino te. Mpe nayebisi bino solo na mpokwa oyo, Makila na Yesu Klisto ekoká mpenza mpo na kolongola matóno nyonso, mpe ekosala yango.

Liziba moko ezali oyo etondi na Makila, (Mpe bozali pembeni na Yango sikawa.)

Oyo euti na misisa ya Emanuele, (Eloko bobele moko ya solo-solo mpenza oyo etikali na mokili.)

Soki basumuki bamibwaki na liziba yango, Mbindo nyonso ya mabe na bango ekolongwa.

²⁶⁴ Nakosénga na batei oyo sikawa, ná bandeko, soki bokoki koya awa katikati na bato oyo. Moto nyonso oyo azali . . . Ndenge wana nde bobéngaka batei mpo bábondela elongo ná bato? Na bongo, batei nyonso oyo bazali awa, oyo balingi, baoyo basepeli komona milimo kobikisama, bóya awa mpe bótelema lokola lisangá ya mabondeli, mpo tókoka kosangana biso moko, tókende mosika mpe tókabwana ná makambo nyonso mosusu. Mibali ná basi oyo bazali kotia elembo na esika bazali kokende, na mpokwa oyo, na nzela ya Makila na Yesu Klisto, wana bazali kozua Ye na Liloba na Ye, kotióla kino na Bozali na Ye, likoló na Liloba na Ye, mpe koloba: “Ngai oyo, Nkolo. Nazali na eloko moko te ya kopesa, bobele ngai moko, zuá ngai.” Bokolinga koya kotelema elongo ná bango, soki bolingi? Moto nyonso oyo akolinga, áyá mpe átelema. Nzambe ápambola bino, bandeko na ngai. Ezali mpenza malamú mingi. Nasepelaka komona mibali

oyo bazali na mpiko, baoyo basepelaka na milimo ya bato. Nabanzi, bandeko na ngai, ete ezali malamu. Bóya zinga-zinga. Ezali malamu. Bótelema zinga-zinga. Sikawa tika ete tó. . .

²⁶⁵ Soki mobeti piano akoki kobanda kobeta miziki, soki alingi, tóyemba loyembo yango, na boboto sikawa, malamu mpenza, na limemia.

²⁶⁶ Toyei liboso na lisapo moko boye te. Toyei liboso na eloko moko boye te, oyo ezali kaka ya—ya—ya maloba. Kasi toyei liboso na Bozali na Nzambe, Jehovah Nzambe-na-nguya-nyonso, Oyo alakaki, ete: “Esika bato mibale to misato basangani na Nkombo na Ngai, Ngai nakozala wana katikati na bango.” Solólá na Ye ndenge osololaka ná moninga na yo, lobá: “Nkolo, limbisa ngai. Nasalaki masumu.” Mpe tokoyemba.

Liziba moko ezali oyo etondi na Makila,
 Oyo euti na misisa ya Emanuele,
 Soki basumuki bamibwaki kati na Liziba
 yango,
 Mbindo nyonso ya mabe na bango ekolongwa.
 Moyibi wana pene na liwa asepelaki komona
 Liziba yango na eleko na ye;
 Ata ngai nazali mabe lokola ye, tika ete
 Násukola masumu na ngai nyonso.
 Úta namóná na nzela ya kondima Liziba yango
 Oyo etiolaka uta na ba-mpota na Yo,
 Bolingo ya lisiko ekómá mokónza na ngai,
 Mpe ekozala bongo kino liwa na ngai.

²⁶⁷ Kóma mpenza moto moke sikawa. Ozali eloko mpamba. Moko te kati na biso azali eloko monene. Mpe na bosembo nyonso sikawa, na mitema na bino mobimba, bógumba mitema mpe mitó, bisika nyonso, na ndako mobimba.

²⁶⁸ Tata na biso na Likoló, nayebi ete Maloba na Yo ezali mpenza solo. Ekoki kokweya te. Ezali Liloba na Nzambe. Ezali Nzambe. Mpe Olobaki: “Ye oyo akoya epai na Ngai, Nakobwaka ye ata moke te.” Mpe mibali ná basi oyo, bandimisami mpenza, bayebi ete bazali malamu te, bayei liboso awa, na mpokwa oyo, Nkolo, mpo na koyámbola ete bazali na libunga, bayebi ete batándikamaki na koningana moko ya kati, oyo—oyo elobaki na bango ete báya na Liziba. Mpe bango oyo batelemi awa, bagúmbi mitó ná mitema, mpo na komela Mai ya Bomoi, ofelé, oyo elakámáki na Nzambe. Yambá bango, Tata, na Bokonzi na Yo. Bakómi ya Yo.

²⁶⁹ Olobaki: “Moto moko te akoki koya epai na Ngai soki Tata na Ngai abendi ye te liboso. Mpe baoyo nyonso Tata apésá Ngai bakoya epai na Ngai.” Elakisi ete Nzambe nde asili kopésá bango na Klisto, lokola likabo ya bolingo. Mpe bango oyo batelemi awa, Nkolo. “Moto moko te akoki kobótola bango na loboko na Ngai.” Mpe nabondeli, e Nzambe, ete Óbatela bango na mpokwa oyo,

wana batelemi awa, mpe pésa bango libatisi ya Molimo Mosanto wana bazali awa na etumbelo.

270 Tika ete nguya monene ya Klisto étondisa mpenza bomoi na bango sikawa! Batatoli. Basili koyá liboso. Olobaki: “Ye oyo akotátola Ngai liboso na bato, Ngai nakotátola ye liboso na Tata na Ngai ná Banje ya búlee.” Toyebi ete mosala yango esili kosálema.

271 Sikawa, Nkolo, tiá bango elembo na kati ya Bokonzi ya elaka, ya Molimo Mosanto. Kokisa yango, Nkolo. Sopá Molimo na Yo likoló na bango, mpe tóndisa bango na Molimo ya Nzambe na bomoi, mpo bákóma matátoli ya bomoi mikolo nyonso na bomoi na bango, mpo na Bokonzi na Nzambe.

272 Sikawa, tika ete eyánganelo bátelema. Bato nyonso bázala na mabondeli sikawa. Tokobondela ete baoyo . . .

273 Sikawa, moko na moko na bino baoyo boyáki awa na mpokwa oyo, omiyokaki ete ozalaki na lisumu na motema na yo, sikawa ozali na likambo mosusu ya kosala te, bobele kondima yango. Mosantu . . . Bayambaka *Oyo* na kondima. Oyo boyambi ezali kondima. Yesu alobaki: “Moto moko te akoki koya epai na Ngai soki Tata na Ngai abendi ye te liboso. Mpe baoyo nyonso bakoya epai na Ngai,” Akoyamba bango. Akoki kosala ndenge mosusu te, mpo Alakaki yango. Bomoni? Bótalela kotúntuka te sikawa. Bótalela nde Liloba na Ye. Bomoni? Liloba nde elobaki bongo.

274 “Ye oyo akoyoka Maloba na Ngai mpe akondima Ye oyo atindaki Ngai, azali na,” eleko bebe, “Bomoi na seko, mpe akoleka na Kosambisama te, kasi asili kolongwa na kufa mpe koingela na Bomoi.” Molimo Mosanto ezali kobikela likambo ya kotondisama mpe kolatisama na nguya mpo na mosala. Kasi koyambola mpe koyamba Klisto ezali kozala na kondima, mpe oyamboli, mpe omiyoki nsómi, ete Nzambe asili kolimbisa yo na masumu na yo.

275 Mpe likoló na moboko ya Liloba na Ye, Alobaki: “Moto moko te akoki koya soki Tata na Ngai abendi ye te liboso.” Bomoni? Sikawa, Nzambe nde abendaki bino, liboso. “Mpe ye oyo akoya epai na Ngai, Nakobwaka ye ata moke te.” Bomoni? Bomoni? Bo—boyambi yango. Eloko bobele moko, bozali na . . .

276 Ye—Ye akufaki mpo na yo. Masumu na yo elímbisamaki, eleki mibu nkoto moko na nkama libwa. Sikawa uti nde koyamba oyo Ye asalaki mpo na yo. Bomoni? Mpe ondimi ete Akufaki mpo na masumu na yo? Okolinga koyamba Ye lokola mbeka ya masumu na yo? Na elobeli mosusu, oyambi Ye, lokola Azuaki masumu na yo.

277 Okozala na esengo mpe okotonda Ye mpo Azuaki masumu na yo? Ondimi ete Asalaki yango? Na bongo, tómbólá loboko, loba: “Nandimi ete Azui masumu na ngai,” amen, “Azui masumu na ngai.” Malamu.

278 Sikawa, obelemi sikawa mpo na libatisi ya Molimo Mosanto.

279 Soki ozui naino libatisi ya Baklisto te, moko na mibali oyo akotala likambo yango, mpo ózua libatisi ya Baklisto.

280 Kasi sikawa: “Wana Petelo azalaki naino koloba maloba oyo,” liboso bábátisama, “wana Petelo azalaki naino koloba maloba oyo, Molimo Mosanto ekitaki likoló na bango.” Mpo na nini? Bango nyonso bazalaki kozela. Sikawa ozali kozela. Ozali sikawa na mposa ya Eloko moko oyo eko—oyo ekotia bino elemba mpo na kokótisa bino na Bokonzi na Nzambe, Eloko oyo ekozala ya solosolo mpo na bino. Ozali na mposa ya koy- . . . Ozali na mposa ya koyamba Molimo Mosanto, moko na moko na bino, boye te? Ozali na mposa na Yango ye? Na ntembe te. Yango nde nguya oyo ekobatela yo. Bomoni?

Bayángánaki na eteni ya ndako ya likolo,
Bazalaki kobóndela na Nkombo na Ye, . . .
Babátisamaki na Molimo Mosanto,
Mpe nguya mpo na mosala eyáki.

281 Bomoni? Oh, Yango nde oyo ozali na mposa na yango sikawa. Mpe okoki kozua yango, sika-sikawa. Ezali mpo na yo, sika-sikawa.

282 Sikawa, bandeko, bópusana awa. Bisó nyonso sikawa, tótiela bandeko oyo maboko, mpe tóbondela mpo báyamba Molimo Mosanto. Bópusana awa, bandeko. Bópusana awa.

283 Sikawa, eyánganelo mobimba, bótombola maboko sikawa, bino nyonso! . . .? . . .

284 Tata na biso na Likoló, na Nkombo na Nkolo Yesu Klisto, tondisa motema moko na moko awa na libatisi ya Molimo Mosanto.

285 Bóyamba Molimo Mosanto. Bóyamba Molimo Mosanto, bato oyo bazali awa, baoyo batelemi mpe bazali kozela ete Bozali mpe nguya ya Nzambe étondisa bomoi na bango. 🐸

63-0114 Kelelo Elobi Polele Te
Assemblée Chrétienne
Phoenix, Arizona U.S.A.

LINGALA

©2025 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamú ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org